


九靈山房集 附補編

六







九靈山房集

附補編

(六)

戴良撰

王雲五主編
叢書集成初編
九靈山房集
附編
六冊

中華民國二十四年十二月初版

撰者 戴良

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

翁

九靈山房集卷二十五

樂府

短歌行五解

悠悠逝波。歲月幾何。君子有酒。式宴且歌。解一人無百年。五十已過。來途漸少。去途苦多。解二日不重旦。春不兩和。今我不樂。顏能再酩。解三寒蟬在柳。蟋蟀鳴莎。情以秋悲。髮以憂皤。解四旨酒既傾。短歌是哦。聊樂一時。

孰知其他。解五

門有車馬客

門有車馬客。駕言故鄉至。問訊辭未終。相顧輒揮涕。歎我久不歸。流落江海裔。空懷錦繡腸。何有王霸器。童僕失舊歡。妻子生新喟。昔如鷹脫鞵。今作鵠垂翅。仍聞邦族間。近亦多凋弊。市朝既遷易。衣冠恆殄瘁。松柏匝廣阡。蒿萊蕪故第。天運無終窮。人事有崇替。彼道苟如斯。此生安足恃。已矣勿復言。興衰自古然。

巫山高

巫山望欲極。神女出何遲。朝暮自雲雨。君王徒夢思。魂乘林樹合。心著峽猿悲。婉孌陽臺夜。不知今是非。

鴻雁生塞北行

鴻雁何從來。千里度江湘。當春既北飛。涉秋復南翔。南翔遠霜雪。北飛逃畏陽。豈不念鄉塞。所至有炎涼。

客子別家久。遙遙征路長。朝遊齊魯國。暮行吳越鄉。何思拔秦茅。惟憂繫否桑。壯心移歲華。徂貌委年霜。蓬落繞本莖。蓮飄戀舊房。此邦雖樂土。故鄉焉可忘。

戰城南

將軍西出塞。冒頓北臨關。欲戰葱河道。先奪桑乾源。鐵騎已雲集。革車仍電奔。綏邊吾豈敢。聊報一餐恩。

雜怨二首

並翼猶有義。比肩猶有情。誰知歌扇妾。虛負合歡名。君淚如朝露。妾淚如春瀾。朝露應時晞。春瀾何日乾。

三婦豔辭二首

大婦蕩湖船。中婦歌采蓮。小婦獨嬌態。含羞辭未宣。牽篷掩花面。何處不堪憐。大婦翦羅衣。中婦綴珠帷。小婦獨無事。月下理蛾眉。花落滿庭曲。河從覓履基。

飲馬長城窟行

將軍西擊胡。道過長城窟。飲馬馬不前。爲有征人骨。征人之骨朽且寒。沈冤浸恨知幾年。當時亦爲擊胡死。流落孤魂此水邊。秦皇秦皇好征討。誰識窮兵是無道。爲君無道天實亡。不備中朝備北方。一朝禍至。蕭牆起。回首長城空萬里。

雉子班

天地茫茫遂物情。雉子班兮在林垌。心懷耿介飛且鳴。扇綺翼。振錦膺。文章盡稱麗。意氣自多驚。甯判帶箭死。榛莽不肯爲裘奉。聖明韓信烹漢鼎。仲由醢衛庭。智勇難並立。賢愚每相傾。宜哉避世士。往同雉子逃其形。

城上烏

城上烏。脩脩尾。畢畢逋。體寒誰識得。聲短強相呼。爲憶結巢巖穴日。一歲還生八九雛。羽成翮備各飛去。仍留阿母向城隅。向城隅。何所止居。烏將北遊。雛莫與俱。我欲遠銜汝。力弱而口瘖。方欲舍之行。又恐秦家桂樹枯。雛兮雛兮。慎所如。毋毀汝巢。毋闕汝軀。

有所思

我思美人乃在瀛海之東隅。去路何迢迢。青碕綠浦相縈紆。常時起向高樓望。美人不見空愁予。空愁予。路難越。夢裏縱窺巫峽雲。覺來詎覩洞房月。記得洞房年少時。繡戶文窗羅綺帷。鸚鵡盃中酌芳醑。鴛鴦褥上聽歌辭。荏苒歲云暮。佳期不得願。鏡臺朝揜學月眉。花塔夜黯如雲步。美人兮美人。年年此地暗思君。願君莫作秋來草。一迴見之一迴老。

艾如張

曲

翠爲衿。錦爲衣。朝朝暮暮澤水飛。澤中青草深且茂。莫聽爾媒登壘。壘頭西接桃李場。蓬蘽艾盡有羅張。羅雖可避機。莫測爾誤觸之恐。身傷請看舊日張羅處。祥鳳冥鴻不肯顧。

朱鷺

朱鷺何從止。去啄金堤飲玉水。朝隨赤鴈暮碧雞。蕩漾驚波不得棲。有時挾子上林去。網絲紛紛復難避。不如歛翅江海湄。遠卻幽并遊俠兒。

白頭吟

莫把白頭吟。來調綠綺琴。蜀客當年聘私室。兩情總向琴中得。誰信黃金買賦時。已是青娥辭寵日。兔絲春來託女蘿。雪霜未至尙纏柯。若箇人心如草木。不到白頭妾遭逐。妾有嫁時綠玉簪。時時插髻悅君心。一朝墮地雙股折。恰似君心中道絕。我簪縱折猶共藏。君心一絕去他鄉。

西門行

出西門望崦嵫。莫停乾軸駐坤維。歎人生感盛衰。壽命百年焉可期。燕東逝鴈南歸。今日不樂待何時。鑒徂貌。撫頽機。起招親識飲華卮。歌唱曲。揮舞衣。放情舒意解憂悲。

題羅氏五老圖樂府三解

五石隕東海。鍾秀五老人。五石隕東海。鍾秀五老人。厖眉鶴髮。槁項羶身。韜光養晦。葆精毓神。年既孔高。福亦隨臻。歌以言之。鍾秀五老人。

家居五磊山人與山俱壽。家居五磊山人與山俱壽。伯也居前。叔兮在後。上孤楚老。下鄙燕寶。如星之列。如嶽之秀。歌以言之。人與山俱壽。

睢陽圖五老。乃萃羅氏門。睢陽圖五老。乃萃羅氏門。昔聯鄉梓。今則同根。昔在朋僚。今作弟昆。匪善曷致。匪義奚敦。歌以言之。乃萃羅氏門。

日重光行

日重光。天命良悠悠。日重光。陰迴陽薄。春復秋。日重光。人生百年苦易滿。日重光。黑髮幾時還白頭。日重光。花謝必再開。日重光。人不再少老卽休。日重光。堪歎富貴利達。日重光。一時變滅如浮漚。日重光。何不學彼神仙。日重光。遙遙物外身長留。

月重輪行

天運茫茫。月重輪。盛時難久長。月重輪。窮通榮辱。一來一去無常。月重輪。人生在世。忽焉遷變。如流光。月重輪。善哉古昔人。功立名揚。身沒之後。千載何煌煌。愚覩一時。聖視無疆。我觀我生。堪歎傷。堪歎傷。

五言古詩

感懷十九首

黃虞去我遠。大道邈難追。悠悠觀世運。終古歎興衰。王風哀以思。周室日陵遲。二伯方迭起。七雄更相持。兼并逮狂秦。干戈益紛披。復聞晉虜亂。五胡乘禍機。殺伐代相尋。昏虐無休期。羣生困塗炭。萬象翳氛霏。豈無憂世者。咄嗟吾道非。楚狂隱歌鳳。商山淪采芝。去去君勿疑。古今同一時。杪歲屬搖落。青蒲忽青青。萌達未幾日。大火已南明。天運一如是。廢興安得停。商郊遷夏鼎。殷士裸周京。

冀方既已沒。毫社亦已平。務光真達道。敵屣薄時榮。
大運淪三代。高人尙誰窺。昭昭羊裘子。乃悟白雲期。身託富春耕。心貫桐江絲。高視萬乘主。清風振四垂。
世間驕豪輩。驅逼正巉巖。何當攀逸駕。山顛與水湄。
寵極辱會至。勢利真禍羅。君看道旁木。幾曾成斧柯。世中繁華子。追恨每苦多。芬芳有徂謝。平地生波風。
陸機去華亭。蘇子狹三河。平生已謂畢。末路其如何。
高居觀羣動。役役將何爲。巧智遞傾奪。利欲爭刀錐。古昔有遺言。財多怨之歸。天桃沐春雨。灼灼能幾時。
累愚不知戒。永爲達士嗤。

吾觀陰陽化。浩浩靡有停。圓光甫東照。靈曜已西傾。以之歎斯世。誰能獨久生。金仙談寂滅。老聃示窈冥。
亦有羨門子。道與元化并。不死復不老。翩然凌太清。顧憐蚩蚩輩。誑譎誤丹經。

秋風何蕭瑟。一夜下庭綠。登高望宇宙。悄悄傷心曲。人生百年內。四序相迫促。衰顏與頹運。去去不再復。
今晨與君會。明旦成往躅。夸父走虞淵。前途乃爾速。世人不自悟。朝暮營所欲。冰炭滿襟抱。殊無一朝足。
奄忽乘物化。身名同草木。

時秋救邊急。喧呼聞點兵。荒城接沙漠。羣馬盡嘶鳴。荷戟者誰子。贏糧將遠征。借問何所之。天驕窺漢城。
西奔丁零塞。北走單于亭。窮冬冰雪交。殊方不可行。骨肉兩決絕。悲極哭無聲。怯卒當勁虜。投魚鱸長鯨。
已分沙場死。暴骨無完形。驅車舍之去。不忍聽此聲。聖人御寓內。早使太階平。

伐木音久廢。交友竟吾欺。利害紛啖食。迫逐方交馳。晨起踐零露。四顧將安之。東路阻山海。北走到臨淄。臨淄古齊國。瀟風亦早衰。惟聞管敬仲。嘗受鮑叔知。其人今已歿。鄉里失其依。知音苟不存。仗劍起旋歸。蛩蛩分蟹食。有難負以逃。一飽不忘報。況復成久要。子大啄母腦。亦有東山鵝。同氣且相殘。將復敦外交。蓬萊與方丈。乃在東海湄。中有一老翁。人說是安期。曉沐陽谷水。夜燔若木枝。手中碧玉笙。時把紫鸞吹。我欲訪仙術。長跪前致辭。飈車歛高舉。騰空掩徂輝。躋攀莫能及。望望成朵頤。何時駕飛鶴。揮手與世辭。元圃有丹木。八榦何亭亭。光同白玉潤。液比碧瑤清。不知何年代。產此至陽精。仙經所嘗言。服之可千齡。吾將具舟楫。涉海掇其英。

良辰豈長遇。陰晦在須臾。今日弗爲樂。明旦恐不如。都門多佳麗。清嘯當座隅。促席道平素。況有高士俱。列俎過三鼎。傾酒盡百壺。揮金娛心意。慷慨不留儲。達人每滔蕩。俗士恆自拘。白頭懷轆軻。撫已一長吁。在世忽如寄。胡乃勞其生。濁酒報初熟。頽然醉前榮。日莫彩雲歛。天宇湛虛明。羣動各已息。一鳥忽嚶鳴。感之欲長歎。酒至還復傾。陶公歿已久。誰能喻吾情。

索居將永矣。浩然懷故都。故都何處所。限此江湖與。時時起望之。風波緬前途。獨見雙飛燕。連翩還我廬。我廬有叢菊。近亦開幾株。恐從分別來。靈根日就蕪。請爲語比鄰。蚤把惡草除。惡草除已盡。歎息復何如。落葉響空山。羈鳥號莫林。此時單居婦。哀怨起瑤琴。清商逐風轉。三歎有餘音。分明曲中意。感此離恨深。空牀亦易守。時寒難獨禁。涼飈一夕起。達曙懷重衾。君固執高節。詎知傷妾心。

家藏兩寶劍。已合雌與雄。潛鋒在金匣。謂當長相從。何言風雨夕。化作雙蛟龍。一遊吳水西。一落豐城東。相去邈千里。時時氣上衝。神物終不隔。歲晏會當逢。

遊魚返重淵。飛鳥歸莫山。行子別鄉國。既久何當還。日落長風起。稜稜氣遂寒。居人息深帷。浮客未遑餐。憂虞銷素質。風霜凋夙顏。惟餘一寸心。歲莫保貞堅。

涉波采芳馨。見此綠荷好。搴莖折其絲。芳情共纏繞。良人久離居。欲寄隔遠道。遠道不可卽。擘物坐空老。

遊香山

薄遊東海日。已羨香山名。飄泊遇知己。招邀諧夙情。漾舟孤浦發。抱策古原行。迤邐遵淨域。紆徐款禪局。披雲禮梵像。漱玉事尊經。洞尋佛迹古。井瞰錫泉清。前峰象騰勢。後崖獅化形。忍草林際碧。覺花川上明。塵中累可絕。物外理宜冥。願言持有漏。卽此問無生。

遊東湖

漾舟疑港斷。進帆喜湖廣。境麗趣非一。路迷心已往。雲峰互稠沓。烟波紛滉漾。梵宇浮鏡入。琳宮躡屏上。浪起孤嶼沉。水落衆山長。隱隱草畔堤。悠悠蘆際榜。幽懷自此多。客情復誰獎。身固脫虞穿。心猶寄塵網。安得超世姿。來縱山泉賞。

遊大慈山

水行境謂盡。陸出路旋通。乃卽蒼松逕。步入青蓮宮。連嶂旣巖崿。密林亦葱蘢。地涉清淨界。身遊紫翠重。

臨流玩廣沼。企石眺奇峰。寒鏡湛秋夕。碧玉劃晴空。蘭若與年峻。象筵緣教崇。謁祠慨鄉相。尋僧叩禪宗。契理已無像。觀念豈有窮。願絕區中緣。永依塵外蹤。嗒然遺身世。年齊天地終。

遊天童山

避囂去城市。遣悶在川岑。遂申獨往意。行此無盡林。松篁儼映鬱。蒼翠邈深沉。九隴山已見。三生石可尋。列障圍招提。傑閣俯嶠嶽。池光亂塔影。澗流傳磬音。龍化井已竭。虎去泉徒深。周顧信靈迹。遲留多賞心。念未委塵妄。事可息煩襟。卽理苟已協。何用戀華簪。

遊育王山

栩栩招提遊。冥冥山海觀。玉几峰影橫。金沙水流漫。鷲嶺蹇皦日。鴈塔峙清漢。遠睇朱甍起。近覩丹宮煥。金輪事已往。舍利光猶爛。亦有巨人迹。不隨塵劫換。陟降境愈繁。應接日旋晏。耆闍固追衍。泉石寧盡翫。浮生諒多途。又動歸與歎。

贈別汪定海三首

兄弟本同氣。恒如行路人。誰知風塵交。翻勝骨肉親。異鄉方繾綣。中路遽乖分。素琴彈別鷓。有耳不忍聞。前舟已云發。後舟更誰待。春事動江臯。客愁滿山海。別晷只須臾。會期知何在。亦旣遠素心。安得顏不改。故人忽已別。兀兀吾何適。暮投甬東路。不見往來迹。古寺靜脩廊。空齋冷虛壁。獨有階上苔。猶如舊時碧。

題盤隱軒

曲蹊繚深碧。迴澗澄遙清。誰知慈水上。亦有盤谷名。慕巢屏世喧。等李薄時榮。仿像中原路。迢遞太行行。軒居儼映蔚。薨棟歛崢嶸。暑檻停綠樹。夕塔飄素英。一翁臨暮齒。二允當弱齡。秫醕報初熟。瓢葦自同傾。厭厭檢素展。寂寂塵事冥。窺鳥感歸翼。觀魚悟潛形。旣已愜時物。亦復諧友生。琴書許交錯。辭翰俾縱橫。老我記曾遊。遙途阻重征。溪山寄幽夢。林堂留恨情。可隨東浦月。流光到君庭。

贈星士

少小事游說。南越仍北燕。謀身難委數。作事詎由天。偶遇青囊術。從究白衣年。窮通三算裏。出處九宮前。乃知蠱蝨臣。亦應箕斗纏。諄諄造命訓。粲粲非相篇。其言固多辨。乃不識子賢。

遊慈湖

青年尙奇偉。未暮竟迤邐。出遊訪陳迹。歷覽愧前賢。湖光紛蕩漾。山色互澄鮮。人以淑氣鍾。境由名德傳。我來值初夏。物意盈化先。渚蒲革曩粹。雨荷媚新妍。披榛度南極。躡苔趨北原。川岳無隱形。祠宇有餘間。俛視淵底魚。仰觀天上鷲。撫化心已愜。卽物理自全。舞雩記會詠。濠梁憶莊言。不見祠下人。感激爲誰歎。

遊定水

常公開化地。源師講經處。人物有古今。山川無新故。橐籥旣西峙。鳴鶴亦東翥。清泉冽廣沼。蒼松夾永路。入寺結青蓮。愛方薰玉樹。三足想後因。四禪感前悟。此生真幻化。學道奈遲暮。感歎願昔心。悵焉起遐慕。

蒲菴

瞻彼水中蒲。采之將何以。母老不下堂。兒行在萬里。空門隆孝思。除是睦州師。

天香室

咄此月中桂。移根向金沙。清香滿幽室。天都亦未加。憶在梵王家。曾看優鉢華。

中秋翫月

前時避世亂。遑遑齊魯間。豈無中秋月。掩淚不忍看。南來如昨日。秋空月又圓。時運尙環周。客子未歸旋。身羈逆旅舍。迹隱滄海壖。不惜歲年晚。所悲窮路寒。知心有好友。置酒當前軒。邀月與之俱。怡我戚戚顏。我顏固可怡。我心亦可歡。獨奈秋月輝。鮮明非往年。

次韻答毛彝仲提學

毛君於爲詩。思擅語復老。氣吞雲夢入。力蹴崑崙倒。杜壇時踔躡。韓窟極探討。晉宋失風騷。齊梁讓葩藻。謂當擇珉玉。乃忽忘醜好。繽紛贈瑰詞。錯落見龜寶。泠泠伐木音。疊疊太玄草。光怪瞻陋室。巧麗怛愚鳥。朝諷已推襟。暮讀仍遠抱。戒亡擬刻琖。懼泄思燕橐。才高每遭忌。命險真再造。昔也赴湘流。今茲蹈海潦。人固有屈伸。世豈無白阜。羽翼低易摧。聲名積難掃。指注者流俗。鑒觀則穹昊。誰其絃我歌。爲君薦神保。

客中寫懷六首

寄婦

結髮爲夫婦。所願在偕老。誰知頭白來。喪亂不相保。我昔從一官。攜汝登遠道。芙蓉蕩風波。寧有幾時好。

猶記東門日。別歸芳草草。再拜前致辭。幽咽不能道。手提小兒女。慟哭向秋昊。詎識是生離。積骨白浩浩。汝歸終可安。我去事轉艱。家既異疇昔。去住亦俱難。況乃畢婚嫁。百費萃茲年。內方撫羣小。外復給上官。日夜聲嗷嗷。孰與分憂煎。夫妻不同苦。不如寡與鰥。汝幸毋我尤。我行偶迤邐。人道無終乖。天運久亦還。豈復長流蕩。庶往共飢寒。

憶子

綿綿我瓜瓞。引蔓空爾長。有子將得力。棄之往他鄉。他鄉與故里。兩地永相望。獨有中天月。遠照雙松堂。雙松我所植。念之猶不忘。況復兒與女。不見今六霜。大兒踰弱冠。有姊同己長。相當望我時。齊行松樹傍。見樹不見父。嗚咽淚成行。小女年尙稚。與弟走踉蹌。相呼戲樹下。何處褰父裳。反哺有慈烏。跪乳有羔羊。人事獨睽乖。俛仰我心傷。

念姊

淮陰古壯士。猶感漂母情。而況我同氣。由來恩愛并。一朝遭世患。舍之以徂征。惟當欲去時。涕泗下交傾。荏苒歲年莫。兩鬢各星星。每念焚鬚事。怛焉心內驚。老去成飄蕩。所志在偷生。顧枉申申詈。詈我久遠行。我欲喻中懷。獨有絃歌聲。絃歌清且悲。一鼓淚已零。再鼓三歎息。四座不忍聽。可隨晨風去。長跪陳素情。

思弟

將老計轉拙。故里不得安。兄弟各東西。何用保餘年。前時吳山上。與汝酌東軒。已知是久別。盃行淚如泉。

征夫懷往路。居士戀故山。音容從此隔。望望兩心酸。去冬得汝書。知汝病未痊。道遠不能顧。掩書一長歎。邇來頻夢汝。喜汝無病顏。生死方未知。誰能詰其端。自嗟農家子。止合老田園。才疏學更誤。遂爲塵網纏。晚節益零落。何日得歸旋。仰視雲邊雁。羣飛必相連。徘徊失所從。愴然摧心肝。

示姪

老來逃世難。心力豈能及。賴有平生親。得免諸患入。時當萬里行。所向輒險澁。山多虎豹虞。水有風浪急。自非吾骨肉。誰能去鄉邑。已遂伯陽遁。尙灑楊朱泣。何邦爲樂土。仍期共棲集。囊中黃金盡。資用將何給。豈惜終憔悴。在困難獨立。慚然念猶子。詠言著斯什。

懷友

貴盛多士趨。衰賤親交棄。投老涉險艱。誰人敦氣義。往歲客吳越。保身無善計。風雨交橫來。倉皇不知避。陰雲竟日起。龍蛇沸相噬。咫尺且莫期。千里詎能致。徘徊畏途上。所向色憔悴。不有高世士。緩急吾何恃。時時想舊情。涕淚滿衣袂。恨無縮地法。一見陳往事。絕塞悲鴻鷗。秋原老騏驥。同心不在眼。蹉跎愧前志。

賤生述懷呈在座諸公

靡靡五月中。忽忽值初度。載觀此身世。安得不悲慕。我自弱冠來。早已失恃怙。莫攀墳上柏。幾歷歲華莫。一官冀榮親。乃與禍機遇。不得顧妻孥。誰能問邱墓。三歲客東海。月夜鵲飛樹。餘年尙幾何。未知止息處。幸有同心人。相期此漂寓。投身豈無所。揆意難卽去。今日定何日。兩鬢已垂素。猶子請揮觴。邀賓強笑語。

詎識忘憂物。翻是傷心具。我親長已矣。我兒今孰撫。一女年亦笄。誰與畢婚娶。固賴慈母在。艱難營近務。終愧爲人父。有子不能顧。盛衰豈人爲。賢愚亦天數。苟不替宗祧。何憂復何懼。我躬且不閱。尙暇身後慮。

近觀以大鶴年和韻諸詩因借韻呈二君子併述己志云三首

輝輝凌霜葉。歲暮靄顏色。宜哉固窮士。秉心如鐵石。志乖尙欣豫。道勝豈愁寂。冠服自今茲。操行真古昔。挾册時政寒。照簷光已夕。孫生讓苦心。袁安同至德。長風掃凝塵。荒苔翳行迹。知音諒已稀。守賤何所惜。棲棲東鄰子。亦脫卜公幘。

內懷松桂性。外抱霜雪色。心已委窮通。家豈問儻石。義廩餉飢劬。僧榻借禪寂。晤歌度芳晝。清嘯終遙昔。避世多歲年。臥病幾晨夕。使者求顏闔。邦伯候龐德。塵中旣息交。物外姑屏迹。但期高士賞。豈顧癡人惜。緼袍苟不恥。無言受衣幘。

傷禽有驚韻。達士無怨色。彼道政多歧。我心非轉石。遙途寄孤蹇。衡茅守虛寂。新喜絕方來。故歡漸宿昔。靡靡念平生。厭厭閱朝夕。青黃信爲災。支離乃其德。老疇尙蓬累。宣尼猶削迹。蹈道苟勿愆。沒身亦何惜。且共酣中人。一笑穿吾幘。

九靈山房集卷二十六

五言古詩

貢尙書新祠六詠

高風臺

重城控閩徼。維西有崇臺。江練望中滅。峰蓮行處開。海引頽波去。山約高風來。境在人已亡。目極令心哀。

鳴鳳亭

言登三山道。遙望鳴鳳亭。勢高翔北極。境勝壓南溟。已協吹笙趣。空多銜詔情。嘗聞故老語。貢公此遺榮。

西泠泉

茲泉誰所發。地脈一朝通。昔彰思治意。今寓澤物功。停車已酌廉。橫經仍養蒙。伊人竟何在。流恨有遺蹤。

思玩軒

粵部蒞星使。海邦分地官。清聲播遐壤。遺愛託茲山。履綦滅遊迹。祠宇有餘閒。椒漿阻臨奠。延首一長歎。

樂善齋

若人抱深識。有善必見知。重士慕公旦。好賢比緇衣。匹儔慕景響。僉從隘門基。高齋今寂寞。歲晏吾何依。

白雲窩

行窩僅容膝。胡乃以雲名。呂觀旣云披。陶思亦嘗停。仰簷歌郁郁。觀室詠英英。豈爲其人沒。悠然見光靈。庸道提學訪予定川寓舍旣而雲莊提學亦來會次日庸道別去雲莊攜酒至明波約予同餞予以

病不果往雲莊有詩遂次其韻五首

越人薄交義。孰主雞壇盟。遺佩憶滄浦。合劍慕延平。懷故非任運。歎新真達生。振衣者誰氏。理棹此趨程。亭午造東館。薄晚饌前榮。相求配伐木。吐訊感分荆。但聞悲促柱。不覩笑絕纓。萬事良已矣。且共咀芝英。青春豈長遇。白日不再中。得失笑魯寶。存亡悲楚弓。宦遊能幾日。干戈已一終。咄茲年歲邁。何人心志同。終然蒲葦岸。偶映金碧叢。設筵畫堂北。睇雲天漢東。舉杯問明月。脫巾御冷風。倡酬歡徹夜。歌嘯聲摩空。身世付蟻螻。榮願等蒼通。放浪至天旭。庭燭尙搖紅。

句章古名郡。遊子號鱗襲。惟今有兩士。絕世而竄立。儒宮鼓篋遊。軍門排闥入。開囊但觚翰。持囊盡詩什。避時車已捨。登途履仍輯。丹心豈徒秉。苦節諒難及。亦有牆東客。時同話憂悒。

居人懽未畢。行客舟已理。晤對豈無人。眷戀在之子。灑灑清風生。英英白雲起。喜消飛珮初。愁纏分袂始。君情江上波。我心井中水。去住不獲偕。感傷何時已。

負痾乖飲餞。神往形獨留。已悲陰漠漠。復感風颼颼。遊魚樂同逝。鳴鳥悅相酬。心交忽已遠。志合更誰求。酒甕漉初熟。蔬畦摘新柔。座有古毛義。寺逢今貫休。以之宴河曲。相從賦刀頭。佳會顧愆期。愁鬢已先秋。誰能久寂寞。指景逐行舟。

九月八日閒居無事因誦淵明秋菊滿園持醪靡由之語慨歎久之忽雲莊提學攜酒見過遂歡然共醉

運行儻飄忽。逝水縱虛舟。朱夏始徂暑。素節已深秋。天高涼風冽。露凝寒氣浮。歸燕別春巢。來鴻鳴曉樓。菊可壽衰質。酒能消隱憂。顧茲孤蹇迹。孰慰年歲流。知心有好友。攜酒訪窮愁。摘芳相映媚。引滿同獻酬。一酌情已遠。重觴興彌幽。插花我放曠。持爵子夷猶。寥寥汝陽飲。邈邈龍山遊。吾今思已高。何用登崇邱。

芳橋宴集分韻得兩字

昔思整去裝。今願憩徂兩。顧茲世路艱。愈歎日車往。達人豁繁憂。美景恣歡賞。座有朋簪合。庭多賓珮響。摘萸新貯囊。采菊細擊掌。時物已內酬。客心仍外獎。信美終異鄉。雖樂非故黨。何時息風波。一葦泛河廣。

題蘭芳齋

靄靄高齋暮。浮遊此空林。不遣蘭爲友。孰可與同心。綠豔媿秋色。紫葩搖夕陰。芳意徒自負。幽期竟誰尋。以之念身世。三歎援孤琴。猗猗不成操。豈爲無知音。

東山宴集分韻得月字

良儔會遙途。芳醕宴華月。繁思靄元夜。浩歌振清樾。暫合樂易窮。念離憂難歇。綿綿道路艱。冉冉歲月忽。後茲胥會時。知添幾霜髮。

遊龍山

昔聞龍石名。今覓龍山路。泛江循近洲。卽陸入遙樹。離離列綵巖。泫泫濯甘露。歛見雨微峰。高出雲飛處。好山殊未歷。遊子已多趣。尋幽雖欲行。愛境不能去。庶憑物外蹤。稍息塵中慮。佛廬旣崇曠。雲閣復高據。登臨當雨餘。眺望屬秋暮。意同疏木寒。興逐驚鳥竄。蒼蒼暝色起。杳杳晚鐘度。耽翫樂地幽。趨事嫌迹遽。爲謝林下人。行當重遊寓。

遊清泉寺

路繞蒼松迴。寺俯清泉幽。況復得佳友。來遊當杪秋。情隨水聲遠。興挾山光浮。兩礪涉遊足。雙峰睇吟眸。陸尋虞監宅。林訪袁家邱。徘徊念疇昔。感歎罷冥搜。古今如大夢。身世一浮漚。不悟無生樂。終纏有漏憂。悟言資道侶。冥理釋緇流。咄嗟已成累。竟動故園愁。

永樂寺觀先師柳公三大篆及諸石刻泫然賦此

舍舟遵微行。振衣遊淨域。誰知登眺初。已動存歿憶。大篆揭巍堂。古句刻貞石。辭翰固留今。身世悉成昔。筠綠雨新霽。山寒窗易夕。方懷露電悲。何有林泉適。出覩塔上苔。一是舊行跡。我心如礪水。欲流翻震激。自定水回舟。漏幾溺。

清遊夙所嗜。投老興未已。一朝得良儔。投袂爲之起。龍山屐旣躡。藍水舟亦熾。復訪清泉境。三宿石林趾。葉氏好弟兄。堅留酣酒醴。屢辭不聽去。維繫久乃弛。遂乘一敗艇。夜遡潮江水。中流遭墊溺。指顧有生死。旣類投湘屈。復近捉月李。雲莊得神助。躍出洪波裏。長呼施援手。臂與老猿似。唐生脫靴鞵。投棄如敝屣。

亂江上崩岸。赤腳不顧禮。空津稍駢集。隙地僅盈咫。前江後吠渚。擬步輒傾圮。旣爲屈螻躄。復作拳鷺峙。頃之雲益黑。四顧無託止。復賴雲莊仙。指揮命舟子。竟將補天術。塞卻漏船底。仍逆衝波急。直榜慈溪涘。已瞻舊館近。舍舟同步履。叩門訴館人。慰藉雜悲喜。咄茲六尺軀。忽忽當暮齒。危途冒險艱。到今知有幾。君子處斯世。真與此舟比。傾覆乃其宜。得濟誠幸爾。因歌戒溺篇。持用謝知己。

書畫舫宴集分韻得澹字

平生學已誤。未暮道逾貶。久酣世味醲。益羨朋交澹。座旣接簪纓。享復與昌歆。偶會情卽親。未識氣已感。驚鱗樂連藻。倦翮媚叢葢。旣忝末席歡。不飲吾何敢。

以大先生遺冬菊

時冬卉木變。高齋淒以清。不有籬下菊。芳意竟何成。夕餐金爛爛。曉掇星熒熒。已足娛晚歲。況可制頽齡。君子篤惠愛。分贈到空庭。盈盈一水隔。託此結幽盟。色以喻中道。香以表孤貞。一花知微賤。所貴故人情。

題葉守常愛竹軒

詩嘗詠淇澳。律亦鳴嶰谷。逖聽豈不懷。希聲竟誰續。有美幽隱人。早厭喧囂俗。作室臨地偏。開軒愛筠綠。兩葉媚晨觀。烟梢延晚矚。攀枝想龍化。摘實遲鸞宿。賢思晉士七。逸慕唐人六。清遊茂林下。沈飲迴溪曲。喧飈蕩昏旦。層輝麗川陸。至樂非外求。深情自爲足。謬循遊士蹤。偶覩高人躅。可隨竹畔風。瀟灑歸君屋。汪明府以畫竹遺唐伯度求予題

攢榦纒數尺。幽姿已猗猗。憶在縣齋日。偏栽此竹多。寫直方有託。持贈意如何。

題清暉樓

緬懷石壁遊。載歌康樂詩。築室抗華嶠。臨流對清暉。坐中鳳湖見。窗際龍岫微。近矚層波渙。遠睇連岡馳。巉巖曙雲裏。激激夕陽時。氣候非一狀。遊觀具在斯。之子謝維繫。息景偃郊圻。峰影墮書帙。波光搖硯池。陋彼金門步。敦此玉山期。而我去鄉縣。空林閉衡闈。式窺登樓作。益動歸田思。

題鳳湖梧竹居

鳳去臺久空。世已非姬周。誰知東海地。尙想西康州。爲重王者興。庶希靈羽留。種竹實下垂。植梧枝相樛。風雲感期會。牛斗懷匹儔。於德苟無取。此計豈良謀。鳳瑞固難俟。人瑞當易求。若士產衆難。結巢居上頭。朝琢玉山禾。夕飲醴泉流。坐看綵翮就。起作赤霄遊。小將啓家慶。大可昭皇猷。碧梧與翠竹。致此蓋有由。訪烏繼善不值。明日以詩見寄。遂次韻答之。三首。

達士不羈世。投身向寬閒。出處一虛閣。翠樾帶澄瀾。高懷抗塵表。逸思窮元間。亦念泣歧客。悠悠歡會難。青雲志已乖。白頭元懶草。家貧無宿儲。逐食在遠道。風霜減容鬢。憂虞損襟抱。不有同心人。誰其慰枯槁。佳期詎可失。況乃桑榆時。居人忽不見。行子終何之。暮色已凝嶼。晴光始泛池。默默就歸路。益歎瓊樹枝。

甬東精舍訪安仲善書記

繚繞西城曲。逶迤一徑通。院深不知處。日暮但聞鐘。蔓草泛光迴。潛筠結影重。疆公舊弟子。亦住此林中。

朝夕孰與晤。二難言笑同。弟兄世多有。誰共得禪宗。稍約遊山侶。來尋汲澗蹤。境幽慮自淡。詎能承道風。
王止善自鳴鶴來訪賦此以別

貴賤異今迹。賓友易前心。況乃干戈際。復此歲年侵。門巷久已寂。劍佩非所臨。洞識棄衰盛。高誼繼浮沉。
顧枉丹梯步。見就碧川潯。羈足戀歸影。迷羽怯離音。明發忽言邁。幽懷浩難禁。神交不在舊。歡會當自今。
倘遂卜鄰願。遲子湖山岑。

龜毛廬

倦遊去朝市。委懷在田園。既悟執戟疲。益知荷蓀賢。夙晨飯牛出。夕曛負耒還。春作固云力。秋斂未盈廩。
求贏豈其願。拙業乃所安。不見龜上毛。成氈亦良難。

草心菴

息念謝囂俗。滅迹偃中林。川岑寓耳目。邱壠曠形音。虛堂帷幔撤。幽途狐兔侵。戲斑既成昔。刻養空遺今。
探囊悲識遠。閉坎憶情深。雖後三春景。寧忘寸草心。

題靜勝軒

端居觀羣動。貴賤各有營。刀錐競微利。風塵逐浮榮。朝暮走囂市。夢想戀神京。冰炭俱在懷。是非亦交嬰。
不爲物外纏。獨有靜者情。松門盡日掩。山鳥繞舍鳴。捲幔風花落。步庭春草生。地遠慮自澹。身閒心乃清。
逍遙足爲樂。一笑萬事輕。

題嚴氏蒼雲軒殿乃子陵之後。故取雲山蒼蒼語名軒。

茂植有鬱條。澄源無濁流。若人嗣芳允。撫境懷令猷。蒼蒼亂山出。翳翳族雲浮。何言姚江住。不似嚴灘遊。雨耕循近墅。烟釣薄遙洲。晨出庭戶靜。夕息軒窗幽。第嫌古今迹。永間東西州。悽悽百世心。眷眷千里眸。存家子悵惘。浪迹我夷猶。忽觀述祖作。祇重越鄉憂。

題魏氏福源精舍在上虞夏蓋湖

虞耕表鄉縣。夏載紀山川。前聖事多往。後哲慶方延。偉茲鄭國裔。彌曠李唐年。運移澤謂竭。家久禮益傳。直道遡前訓。孝思光往篇。合宗懋民德。通急拯時遘。幼壯尙沉滓。未暮豈纏牽。山遊玩松月。湖泛弄苔泉。地隔人烟迥。天浮雲景鮮。生應寄別業。死竟託幽筵。名無汗簡錄。行有金石鐫。每覩穹碑煥。兼懷嗣子賢。欲知百世後。當求千載前。本固榮斯盛。源深福乃綿。羨魚須結網。不稼詎盈廛。寫誠勵朋好。世美非徒然。

對春雪寄梧竹翁二首

當時寒已收。今茲陰尙結。惜此豔陽天。盡付蕭騷雪。穿花適自亂。雜雨詎成潔。獨有灞橋人。詩思益清絕。積雨已兩月。飛雪亦二旬。但釀谷中寒。詎覩原上春。庭無鳥聲樂。門有虎迹新。君子篤惠愛。應念臥飢人。十一月十日。紀宗正夏君衡約遊東湖。舟行未數里。雨忽大作。乘夜至湖下。宿高氏墓廬。頽垣敗屋。而四顧蕭然。君衡呼酒劇飲。談至夜分。霑醉就睡。亦佳甚。獨惜孔昭葉君。旣行而復止。不得與此清會。次早簷溜不絕。遂泛舟而回。舟中作此。以示同遊諸公。且寄孔昭。

遠觀芳年謝。坐虧清景遊。幸茲舟楫具。肯爲晦冥留。空江已過濟。凝雲猶未收。浦寒雨隨作。篷漏霰仍投。澄湖限遙境。溢潦翻近疇。急時暗促榜。失路夜迷洲。老篙泊洄曲。童子棲浪頭。僅尋空館息。彌動羈客愁。鳥聲入簷急。虎迹當門稠。人吃久失主。鼠欣新得儔。障牖挂衣袂。燭竈爇薪樵。肴核稍羅列。醴醪聊獻酬。僕御競歡謔。賓朋恣吟謳。外患悠悠逝。中情亶亶瘳。已諧安集意。洵爲棲宿謀。掃地藉藁秸。解包出衾裯。棟溜訝潛滴。礎潤驚暗流。偃坐類屈蠖。駢臥劇拘囚。悶懷仍抑噫。苦語重呶憂。默誓屏遊屐。嘉願赴歸舟。陰晴分預卜。行樂且復休。第恨同袍友。近在東家邱。窮年訂期約。此夜闕綢繆。鬱鬱蓄良思。依依仰清猷。茲會已云失。何時復相求。

舟次高錢遲孔昭不至詩以速之

屢約湖曲遊。良辰輒蹉跎。及今風雨夕。一葦凌寒波。遙遙度墟里。靡靡轉坡陀。暫息泉上樓。倚欄頻嘯歌。此時知心友。愆期在山阿。儔侶徯之久。不至復何如。

湖上對雨有懷天淵老禪

空濛暗遙甸。淅瀝響高樹。乍縈林表來。復灑重湖去。瀟瀟孤興發。望望寒川暮。念與道人期。雲深不知處。

留別白沙諸友三首

頻年接歌笑。誰忍隔音形。一爲寒餒迫。頓忘別離情。春帆已駕浦。晨鼓亦催程。可得重相過。同聽夜潮聲。別筵春寂寂。分渚草離離。徘徊折芳杜。悵望失佳期。潮水有虧日。客情無減時。已矣心中事。終遣與誰知。

雨暗長江夕。鐘動寒城曙。居人息深閣。遊子行多露。冥冥見烟花。曖曖想雲樹。不道絕遊從。晨昏自難度。

寄秋崖講師二首

四窗舊弟子。胡乃住茲山。緣思竹一擊。遂分雲半間。宗門資荷負。衲子賴陶甄。毋徒效前懿。飢餐而困眠。涼風振乳泉。落日照白鶴。清境曠蕭條。高僧屬棲泊。談經瓜爲香。說法花亦落。何當棄塵勞。來問無生樂。

承天淵天敍二禪師下願適出不及一會而去詩以謝之

相聞非一日。相會在何年。行道偶來過。盡興復言旋。豈伊塵外迹。合屏區中緣。去就旣殊路。動靜詎皆禪。身名端可遣。物累諒終纏。悠悠仰高韻。默默阻中悁。

七言古詩

揖月樓歌爲陳節判賦

故人昔官東海陲。舉杯邀月月不知。故人今住北江濞。開樓揖月月乃至。彼月於人無愛憎。倏而墜兮忽而昇。一昇一墜催人老。人非靈仙安得與之久相好。君不見漢家有樓號干雲。又不見晉代有樓名伺星。兩樓只今誰作主。惟有明月曾照當時人。當時人已矣。明月獨如故。古往今來共如此。仰看月光能幾度。念此長歌雙淚流。人生似寄君識不。欲遺身世放情意。除是登君揖月之飛樓。月兮月兮於我亦何有。昨照黑頭今白首。黑頭白首可奈何。且盡今宵一杯酒。酒酣爲問誰可揖。世間只有此月心。莫逆。酈生空揖隆準公。汲老徒揖田相國。達固無足取。窮亦不足慕。但願仙人降靈訣。使我長與是月爲賓主。吾聞月中

仙桂芳下有白兔所搗長生不死之藥方。因君儻乞得千載不相忘。

節婦謠爲蔡母賦

四明古郡控海隅。黑雲壓城風振廬。中有一婦貌甚姝。年未三十卽寡居。時時泣血眼欲枯。鳥啾獸躑助號呼。旦夕醕奠絕復蘇。春秋饋祀悲有餘。曷不摧殘殞以軀。白頭爲有堂上姑。姑年旣耄孰與娛。孰具晨殺與夕蔬。晝理蠶桑夜辟繡。經營甘旨美且腴。奉老仍當撫我雛。我雛未解膝下趨。隻身鞠育竭瘁劬。年來能作反哺烏。空堂夜靜簾影疏。燈燭熒熒一寢孤。照容已絕翠與珠。蔽體只穿麻泉襦。人生在世不斯須。茹苦銜辛何太拘。天地立極聖有謨。重茲首教自古初。或始乾坤或關雎。民彝所係理豈誣。濮上桑間俗易汙。柏舟所詠絕代無。紅顏皓腕滿路衢。容不媿德徒區區。卓哉此節誰得如。里巷遺輝日以敷。褒題況復有文儒。芳名好與金石俱。我固頽然一丈夫。貞節傳中書不書。貞節傳中書不書。

丹邱先生歌

丹邱先生好仙靈。自言手把天地肩。雷公電母聽使令。衆真狎恰通丁寧。時秋屬燠氣不清。海頭八月神濤傾。天河咫尺連滄瀛。風號雨蝕不暫停。雲林老臣卻羶腥。欲召羣仙來降精。奈此淋淫時所丁。海媧嶽姥溼輜輶。丹邱先生盍上征。坐驅羽駕逆雲行。赤龍媵御青鳥迎。手執芙蓉朝玉京。告道祠官竭精誠。冀陳脩俎靈爽呈。天胡奪是兩眼睛。有光不照孤巒情。頃之颺風翩以輕。旗旄旣塗擁飛旌。口含天語悄無聲。爲臣特借三日晴。扶桑暘谷曉曜頰。百神雜沓天路平。丹邱先生下太清。首峨瓊弁被玉纓。望中恍惚

儻若驚。訇然向我振威聲。曷不從之學長生。

遊山至葉仲容家飲散因爲醉歌

石林古村鬱深窈。幾處樓居插晴昊。主人喜我攜客來。隔屋頻呼酒家保。老來厭受樊籠束。十日山行恣幽討。世間萬事良可知。一盃且此開懷抱。座中高士毛雲莊。滿腹詩才鬪葩藻。自從偕我林壑遊。得句幾回驚絕倒。況逢地主亦善詩。時出新篇慰枯槁。安得思如劉沈輩。席上同吟醉歌好。窗縈月練愛宵遲。樓度日車嫌曙早。衆賓固盡新知樂。賤子獨懷心慄慄。有家遠在越水東。數日漂流千里道。身心已同風撼木。壽命何殊露垂草。柴桑未返彭澤翁。同谷空悲杜陵老。好對澗水添酒盃。盡把閒愁醉中掃。

胡仲厚爲予寫陋容詩以謝之

世間誰是丹青手。神妙如君不多有。一朝來訪逆旅中。戲捉霜毫貌予醜。人生落地無常身。紅顏幾日白頭新。況當萬死干戈際。豈有丰神堪寫真。胡君胡君眼如電。席上乍窺如慣見。二毛旣已發天機。五采亦復開生面。試拂鸞臺青鏡銅。時時鑒我憂世容。雙眉交攢兩肩聳。政與此圖標格同。聞說朝家畫麟閣。褒公鄂公無處著。不從當代寫英雄。卻向窮途繪老翁。老翁醜狀固無比。一種孤高差足喜。里巷從今詫許仙。慎勿取錢盈二千。

海隄行爲葉敬常州判賦

海潮淼淼海雲黑。幾處居民遭墊溺。豈無精衛填石心。海水無情誰敢敵。餘姚州佐一文儒。射策到來瞻

氣羸手槌大鼓。召丁壯。誓作長堤。備不虞。政行令奔。喧百里。舂鍤紛紛。集如蟻。闔符府檄。適復至。以賦來。從無遠邇。伐山鑿石。條有聲。盡道轟雷。動地鳴。靈胥聞之。尙膽慄。天吳值此。定心驚。頃之地脈。異疇昔。海口分明。見山骨。新隄萬丈。與城延。怒浪狂波。爭不得。從茲疆場。永奠安。黍稷桑麻。應鬱然。當知擊壤行歌。日絕勝。乘濤悔過年。牧童每指村中路。卽是前人沈溺處。念功旣許。髻鬣識。追恨惟容。觸體語。姚江渡頭。夜泊舟。夜間南岸聽儂謳。鯤壑鮫洲。盡耕作。葉公爲政。孰與儔。古有白公及鄭國。引渠漑田足民食。二渠已廢。名尙傳。況乃葉公今更賢。葉公事業海同久。海隄可壞。葉公之名不可朽。

蓬山新樓歌爲方德盛賦

達蓬名山控海壖。東望咫尺蓬岳連。是中樓居高插天。雲籠霧鎖。巢神仙。左蟠龍。岫角鬣全。右挾鳳。坳羽翼。翔澄湖前。浸類鑑。圓層崖後。擁屏障。然一峰來朝。屹不遷。班押海國。瀦爲淵。昂隄伏岸。深扁鍵。驚濤駭浪。矧敢前。彼樓突起。正弗偏。中窺倒景。窟宅專。危臺上。矗拂斗躔。雕闌下。俯隘幅員。綺窗彤檻。燦相鮮。曲房密閣。極邃延。簷間古樹。森戈鋌。簷外老石。寒飛泉。朝嵐夕靄。挂復懸。剛飈浩氣。噲欲穿。芙蓉城闕。特渺綿。瀛洲殿閣。同精甄。老仙兩鬢。白以元。時時陟降。踟背肩。鸞鞭鶴馭。來踟躕。東公西母。恍後先。下觀塵世。直蠅蟻。乃居竈。食羅屋。樓亦有困。食列町。矚口腥。飮腐吁。誰賢。況復年來。逢世癩。滄海盡漲。成桑田。白骨被野。血被川。弱者死。飢勇死。權老仙處此。私自憐。含精養神。心益虔。仍悲凡質。費陶埴。齷齪甘爲。帝所捐。伊予沈痼。久未痊。丹梯百尺。愁攀緣。願從老仙。乞數椽。哈其一字。割中邊。老仙怖我。坐臭羶。弱水幾迴。風

引船。僅容斗室。混民編。穢胃何由猛滌。幸哉道眼。雙炬燃。常時照我不我愆。我參我叩。志倘堅。靈科秘訣。終使傳。食瓜啖棗。度年年。

題何監丞畫山水歌

至正以來畫山水。祕監何侯擅其美。帝御宣文數召見。抽毫幾動天顏喜。有時詔許閱內儲。名筆班班世所無。王吳李范已心識。餘者山堆皆手摹。海內畫工亦無數。才似何侯豈多遇。權門貴戚虛左迎。往往高堂起烟霧。人間一筆不可得。門外車徒謾如織。葉君使還親集送。乘輿始肯留真迹。於時在座總儒冠。王鄭歌辭晚更妍。豈無片語道離恨。見侯之畫筆盡捐。此畫攜歸在鄉縣。萬壑千巖眼中見。卻憶都門送別時。回頭瞥覩西山面。莫言短幅僅盈咫。遠勢固當論萬里。既似山河月裏明。復同衡霍牖中起。葉君眼力老愈光。愛之不減雲錦章。年來行囊盡拋棄。惟將此紙什襲藏。何侯遷官定何處。有客披圖正傾慕。北騎南轅倘相值。煩君爲我致毫素。諸侯一寫滄州趣。

此畫乃葉君孔昭爲南臺宣使時。以公事走京師。祕書監丞何侯思敬爲寫以贈。而畫上所題鄭仲舒。蓋孔昭同門友。時爲國子博士。其王周叔。則孔昭居胄監時同舍主也。時爲翰林檢閱。章甫亦宦遊京。都與孔昭深友愛。一時交舊。皆文學之士。而思敬翰墨尤號知名。孔昭既重思敬之所作。而又以諸君子之會合。不可驟得。攜歸故里。請予詩之。而併識其始末於後。觀圖畫之如新。口遊從之日遠。孔昭安得不慨然於斯。

題顧氏長江圖

天下幾人畫山水。虎頭子孫世莫比。何年寫此長江圖。多少江山歸筆底。巴陵三峽天所開。遠勢似向岷峨來。洞庭瀟湘僅毫末。楚客湘君安在哉。江上一朝風雨急。老我曾來踏舟立。鼓枻旣聞潭畔吟。抱琴復聽竹間泣。別來幾日世已非。忽此披圖憶曩時。早知避地多處所。肯逐紅塵千里歸。林下一夫巾屨似。亦有舟人與漁子。能添野老烟波裏。便與同生復同死。

題出射圖

玉門關南百草腓。玉門關北鬪兵稀。邊頭無事秋馬肥。將軍出射沙塵瀾。一胡據鞍執大旗。翩然前導疾如飛。一胡引梢如附枝。一胡放箭箭不知。後有兩胡蹙騎追。側身拔鏃恐鏃遺。玉門關城迴且巍。一時士馬何神奇。我來塞外按邊陲。曾揮此馬看君騎。爲君取酒盡千卮。醉裏爭誇戰勝歸。到今已是十年期。畫家所寫是耶非。卻憶當初親見時。

題打毬圖

羣胡擊毬世未見。人馬盤盤若風旋。場中一點走如飛。三人躍馬爭先馳。兩人翻身驚且歎。前視後視迴迴轉。平沙蹙踏黃入天。肯使蒼鷹飛向前。身忘激射但狂走。未知毬落誰人手。君不見秦失其鹿人共逐。劉項雌雄幾翻覆。

畫馬圖

吾聞唐家有馬名胡騶。寫入尺楮百千秋。是何筆力妍且勁。眼底飄飄盡龍性。此馬曾經百戰來。豐姿逸態何雄哉。功成未受伏櫪惠。愁對青驪若相語。隰公愛馬兼愛畫。市以千金豈高價。流傳幾手到南荒。夏贇兄弟今襲藏。年深物化使我傷。驍騰無日徒遇伯樂與王良。

袁君廷玉以所藏何思敬山水圖求題爲賦長句

有客訪我城東廬。手持何侯山水圖。乍向高堂一披覩。已知筆力天下無。老我愛山兼愛畫。對此心神忽俱化。得非鼓柁過瀟湘。無乃支藤上嵩華。野亭倒影浸江清。耳邊髣髴波濤聲。漁子蒼茫泛舟入。林翁偃僂渡橋行。因憶良工釋思慮。元氣淋漓滿毫素。豈但胸藏萬邱壑。西極南溟隨指顧。驅山走海何雄哉。滿堂空翠揮不開。丹邱赤城意綿邈。蓬萊弱水情沿洄。何侯天機深。丹青世無敵。自從揮灑近天顏。林下何曾見真迹。年來喪亂走風塵。始爲賢豪下筆親。王吳未可誇神逸。閻公致譽安足珍。與客傳觀權未止。卻歎何侯今已矣。卷圖還客休重看。世間夢境亦如此。

九靈山房集卷二十七

五言律詩

經金繩廢寺

寂寞唐朝寺。頻年客到稀。
空山孤殿在。荒逕一僧歸。
苔色驕秋雨。松聲振夕暉。
驚鳥初有託。近亦出林飛。

鄭城逢故人

一別無消息。誰知住此城。
忽逢難面認。驟語各心驚。
身世丹衷折。干戈白髮生。
憑君陳往事。相看重含情。

客中守歲

旅館生寒夜。條風已轉晨。
絕憐天畔客。虛負歲朝春。
綵勝承恩舊。金錢問卜新。
妻兒千里外。應亦念行人。

挽章處士

處士家何在。棲遲傍海澗。
園林行迹滅。風物畫圖傳。
墓入探樵徑。山餘洗藥泉。
聲名身後著。猶賴子孫賢。

客中憶寄以大千里二先生二首

道路離居久。鄉關入望賒。
此生渾是客。行處卽爲家。
關徑全栽菊。分園半種瓜。
終知多失意。身世一長嗟。

攜家東海上。三載滯還期。
髮爲多憂白。身緣久病衰。
物華誰復對。藥不裏曾離。
幽事關心極。惟歌二妙詩。

自述二首

事業此生休。遑遑今白頭。一年看又盡。數口轉多憂。醉憶山公騎。寒悲季子裘。妻兒重相見。說著也堪羞。家無十日程。歸計苦難成。爲客憂飢餒。頻年仗友生。剛腸隨世屈。白髮向人明。爭似湖居好。扁舟載月行。

歲暮感懷四首

驅馳三十載。身世竟何如。人老憂虞裏。交疏病廢餘。鄉邦書未返。湖海歲將除。後夜燒燈坐。依然歎索居。移家東海上。汨沒度危時。草市腥江鮑。民居雜島夷。衣冠隨俗變。姓字畏人知。保己無深計。翻言命可疑。已被虛名誤。偷生亦偶然。兵戈十年久。妻子幾家全。往事溪雲外。餘齡逝水前。艱難有如此。何日賦歸田。自我離鄉井。棲棲又十秋。一身渾是累。此世可無憂。道路誰青眼。風塵自白頭。但求歸葬地。餘事總休休。

客居三首

豫作全身計。遠投東海行。地偏惟養拙。歲久未知名。苔徑當湖關。柴門逐水成。牧童時聚笑。窮老一先生。漂流何所往。寂寞住湖陰。道路無知己。飢寒亂此心。草枯春牧遠。浪闊夜漁深。敢憚艱虞事。衰年自不禁。寥落空山裏。松門晝亦關。江鄉千里隔。天地一身閒。聽雨多臨水。看雲長傍山。自今幽思熟。無復歎時艱。

辛亥除夕三首

眇眇家何在。悠悠歲又闌。十年東海上。千里北風寒。衰鬢隨年改。愁懷借酒寬。何鄉爲樂土。身世各艱難。湖海風雲暗。道途霜雪清。如何一年盡。翻使百愁生。俗薄乖留計。時危緩去程。家人圍坐夜。應悉旅中情。移居湖水上。已是一年期。客路頻辭歲。家山忘別時。庭寒無鵲噪。春近有梅知。此夜傷情極。椒觴懶獨持。

哭楊大章先生二首

家紹文元學。身安原憲貧。世方推獨行。天忽奪斯人。客路誰傾蓋。湖堤幾詠春。回看攜手處。不語自傷神。
近到揚雄宅。徘徊至夕暉。那知三宿別。竟作九原歸。許劍嗟何及。懸牀事已非。祇應重過日。獨泣向空扉。
三日前嘗訪先生。慈湖之上。蒙留飲。至日莫不聽去。酒□索予數藥方。且言必親至而密受之。故有許劍懸牀之語。

訪止公於文溪

杖錫遊茲地。過從動隔年。已無離別想。那有去來緣。心事青山外。禪機白石前。偶來非道意。敢借慧燈燃。

七言律詩

秋興五首

野色蒼涼日自斜。海城故故隱悲笳。人間已退三庚暑。天上誰乘八月槎。俛首風塵秋有淚。側身天地老無家。杖藜獨立清溪上。愁對歸鴻沒暮霞。

咸陽城下動秋風。落木蕭蕭漢苑空。太液曾聞駐遊輦。上林誰見弋飛鴻。王侯第宅蒼茫外。錦繡山河感慨中。關塞只今無夢到。白頭吟望思何窮。

唐朝宮殿面南山。韋杜曾傳尺五天。馮翊郡連通雨露。崑函地關接風烟。隴雲秦樹空今日。衰草斜陽異昔年。世事紛更共如此。豈須見後始悽然。

鳳凰飛舞下層巒。珠樹瑤花一夜殘。周室舊聞遷寶鼎。漢宮今見泣銅盤。荒祠猶記雙龍柱。壞塚曾傳乙鳥壇。爲歎興亡腸易斷。不須登眺傍高寒。露下碧梧秋氣深。天時人事共蕭森。海流不盡衰年恨。節序祇添故國心。千里還家知幾日。十年逃世至於今。芳樽美酒無人共。安得愁中滿意斟。

偶書

自從北渡浣紗溪。十載家山入望低。失學已憐元亮子。長齋應愧太常妻。百年世事醜難變。一夜鄉心謝豹啼。卻向歸途望遼鶴。白頭和淚寫淒迷。

憶鶴年有賦

投老江湖生事微。隱身草澤接交稀。情同栗里陶彭澤。形似遼東丁令威。紅日曉迷滄海樹。白雲秋老故山薇。牆東野客心同苦。幾度相從話夕暉。

寄沈隱君

故人家住白雲隈。占此崖盤與澗迴。風挾水聲歸逕竹。日將山影上階苔。律書在篋身同棄。瑞檢堆牀手自開。聞說蓬瀛從此達。好騎白鹿訪君來。

庸道既別云自山北訪桂同德胡舜咨而還

何事扁舟此問津。似君標格邈難親。聞聲舊識尙書履。屏迹今義學士巾。鳳口水深湖沒路。龍頭山暝雨

隨人遙知兩地登臨處。念別各傷無限神。

晚至永樂寺

江干細路走羊腸。遠逐鐘聲到上方。水竹暝時雲淡淡。逕松深處月蒼蒼。佛廬夜續傳燈火。僧榻寒薰小篆香。何用別尋天竺去。人言此地卽慈航。

題永樂寺水竹居先師柳待制嘗訪匡長老於此

一上高樓恨有餘。登臨事往竟成虛。已無閑老履約迹。徒認匡公水竹居。佩玉聲流池盡處。琅玕影動月來初。從今便結東林社。曉鉢高擎老衲如。

同淬用剛登甘露寺

丹梯百尺雲苔紋。境有仙凡此處分。殿影恍從天畔落。聲聲渾向竹間聞。山緣龍出饒青靄。峰值雨微多白雲。杖錫又登高閣去。無端詩思忽紛紛。

李帥家烹鶴見餉

千年端有化胎無。一旦烹來野鳥如。身死獨遺沙苑箭。魂歸應詫漆樓書。茅君入帳名空在。衛國乘軒事已虛。慚愧主人情意厚。搜羅異味及巢居。

星菊李盤石家菊有同本異花一紫九黃者

白榆歷歷掩穹蒼。誰種羣星近畫堂。太乙好隨孤豔紫。天津錯認九葩黃。根株灌溉元同品。顏色參差忽

異芳。自是君家多瑞物。作歌從此詔芝房。

瑞蓮李盤石家。蓮有雙花並實者。欲以是扁其堂。求予爲記。

是處秋風滿戶庭。誰家猶有瑞蓮生。雙開自昔聞連蒂。並實於今喜共莖。不學兩妃爭寵態。惟含二女望君情。李侯忠義天偏識。好榜新堂爲勒銘。

五言絕句

題瀟湘八景

洞庭秋月

皓氣澄素流。況當湖正秋。舟人夜半起。倚遍岳陽樓。

瀟湘夜雨

灑江思已悲。入夜聲轉急。遺憶在荆南。臥聽湘妃泣。

山市晴嵐

巖上光已合。林端曙未分。暫出猶衣溼。況乃趁虛人。

漁村夕照

日落川光暝。一舟橫渡頭。心期逐漁網。蕩然俱未收。

平沙落鴈

聲傳孤渚迴。影帶夕陽微。爲有驚弦意。欲下復遲疑。

遠浦歸帆

楚客去鄉久。還家未有期。杳杳長江上。誰遣一帆歸。

烟寺晚鐘

冥冥景尙昏。隱隱聲徐度。山僧方遽起。忽聽錯朝暮。

江天暮雪

遠近忽同色。安知江與山。一棹在中流。不敢過前灘。

七言絕句

賂鄭二君子見訪賦絕句八首

賓王遺韻至今存。自是儒流不易門。詩卷若還題二妙。齊名獨有廣文孫。
客路誰爲骨肉親。兩君邂逅結比鄰。相交自可到頭白。世亂還家有幾人。
前時過我菊初栽。此日望君花正開。聞說欲來相問訊。隔牆幾次候新醅。
獨住江村客到稀。忽聞山犬吠荆扉。青苔黃葉無人掃。買藥兒郎竟未歸。
欲具盤飧餉故知。村荒市遠只隨宜。家人不解艱虞事。猶想客來如舊時。
兩袖龍鍾雙淚垂。故園幾度入愁眉。相過莫說未歸事。一段傷情只自知。

白首相逢能幾迴。羨君仍作等閒來。明年此日知何處。且向空庭嗅落梅。
憔悴江湖一病身。心交盡日話情文。只愁又向溪橋別。後度行來重憶君。

旅懷五首

自昔操觚逐縉紳。也曾白眼看時人。年來點檢平生事。海角天涯一老身。
春半家書預作期。長兒十月送寒衣。江空野曠無消息。踏遍蒼苔又獨歸。
家多子債幾時還。世路悠悠歲又闌。前月山妻書片紙。爲言涕淚不曾乾。
數口迢迢寄海邊。鄉心客計兩茫然。老妻豈悉未歸意。將謂飄蓬似往年。
獨向荒村歌竹枝。寒烟暮雨不勝悲。平生一種淒涼態。豈料偏歸老大時。

題赤壁圖

千載英雄事已休。獨餘明月照江流。畫圖不盡當年恨。卻寫蘇家赤壁遊。

題張藻仲竹木

不見張生已六春。筆頭何事轉清新。鳳池染得龍池雨。寫寄寒林獨立人。

題四皓圖

欲向商山歌采芝。白雲望斷不勝悲。高人只在丹青裏。滿鬢秋風共弈棋。

題畫

憶向江湖歎暮秋。冷鳧晴鴈共汀洲。數株古木寒依水。亦有啼鴉在上頭。

五言長律

歲暮偶題二十二韻

削迹邊山邑。投身傍海城。驅馳悲世事。出處愧家聲。學術元求志。文章豈爲名。前途迷軌轍。末路玷簪纓。藩國羈疏穴。衣冠備老成。乾剛遭久紊。坤軸值旋傾。朋舊千家淚。妻孥兩地情。風塵齊國往。雨雪海邦行。紀晉慚陶令。依劉誤禰衡。世偏欺逆旅。天亦薄遺氓。陋巷棲顏闔。窮途哭步兵。桐君方避姓。越客豈通盟。壯節雙寒鬢。生涯一短檠。道寧隨世屈。身自向人輕。孤矢乖前志。千戈送此生。何心歸故里。浪迹寄遙程。婦怨憐蘇子。男婚憶子平。攜家期浩蕩。逐食歲崢嶸。雲海望中白。雪山愁畔清。寒天催日短。窮臘逼年更。感激芳時謝。淒涼老思驚。客窗歌一曲。涕泗下縱橫。

詠雪三十二韻贈友

暮雲凝黯黯。曉雪墮縱橫。騁巧穿窗牖。乘危集棟莖。挾風潛作黨。雜霰暗分聲。綴柳如欺弱。綦梅似妬清。銀盤浮石出。縞帶逐車成。增勢初堆岳。含光復灑瀛。卽卑猶避污。飄急未忘爭。細度歌帷遠。斜侵舞袖輕。試深窺屢擲。驗密手頻擎。裹樹形披介。摧篁韻嘯笙。堞遙迷睥睨。岸斷接坳泓。罅隙仍仍掩。高低故故平。陵鋪看象鬪。庭積羨猊狞。浪走兒應喜。狂號犬自驚。林寒催雀聚。簷白誤雞鳴。照曜連金闕。微茫混玉京。烏輪埋欲沒。鼈極壓將傾。獻歲先期見。豐祥此日呈。及時銷癘疫。潤物達萌生。列賀喧朝貴。騰歡沸野甍。

第嫌災困約。仍訝助驕盈。冷豔凌迴騎。寒光媚飲觥。風流梁苑宴。悽惻灞橋行。亦有離鄉客。遠居邊海城。底穿嗟履屣。路斷歎門閤。孰動乘舟興。誰憐臥寢情。映書空舊習。授簡豈前榮。倚望勞晨策。吟哦費夜檠。枉煩歌玉樹。寧許媿璇英。刻畫移羣象。搜羅憶五兵。身孤慚待伴。思沮詫羞明。聊示輕微體。殷勤比贈瓊。

哭汪遯齋二十四韻

詩禮趨庭日。風塵筮仕辰。獻荆思報國。捧檄冀榮親。肇典丹陽校。旋蘇海邑民。漁鹽千古舊。絃誦一朝新。浩蕩王綱解。艱虞國步屯。遂令娛綵士。幾作負羈臣。天地裨忠孝。雲山獲隱淪。陶潛猶紀晉。黃綺肯歸秦。體病相如渴。家傷原憲貧。將何具甘旨。併窘奉昏晨。善事行驚俗。高居德照鄰。儒言存道脈。野趣任天真。里巷稱耆艾。鄉邦禮縉紳。時方瞻故老。世忽哭斯人。莫駐桑榆景。翻全寵辱身。聲名應不泯。傳播必殊倫。循吏光前史。文場殿後塵。遺音悲賈鵬。絕筆歎姬麟。有客含情切。長途灑淚頻。知心遺鮑叔。交誼失陳遵。零落今如是。襟懷孰可陳。未懸徐墓劍。空憶漢江綸。獨立西風裏。老吟東海濱。此生何所託。歌罷復霑巾。

歲除示姪十六韻時將遊西浙

客裏光陰速。天涯道路長。漂流知幾處。奔走已三霜。似汝年猶壯。如余老足傷。應慚謝氏父。徒憶阮家郎。識曠惟遊衍。時艱可薦揚。第須依竹徑。未用羨羅囊。卜賣尊公術。醫鈔陸姓方。暇仍研史冊。閒亦愛詩章。運至終超達。道窮姑退藏。晴窗開藥籠。雨館倚書牀。茗水支支綠。淞雲片片黃。客行隨處是。旅食在身彊。白首摧頽甚。青春奔迅將。頻年同患難。此去莫淒涼。木德迎新節。條風換歲陽。萍蹤如可合。處困更何鄉。

哭揭祕監三十四韻

試續儒林傳。之人迹已陳。歸魂鍾阜夜。復魄董溪春。憶昔初觀國。乘時蚤致身。家聲漢司馬。胄教古成均。學術諸生識。才華六館親。南宮然燭夕。北省聽鑾晨。祕閣詩書舊。容臺禮樂新。討論抽邃典。制作邁常倫。信是閩中彥。端爲席上珍。春官方載筆。東郭已埋輪。鵬鷲期高奮。驂騑且遠巡。薇垣蓮幕客。烏府繡衣人。豈獨司喉舌。猶應領縉紳。青冥來健翮。滄海起脩鱗。王氣幽州歇。妖氛國步屯。依劉西適洛。戀闕北過秦。賈傅俄悲鵬。宣尼竟泣麟。風塵辭組日。江漢負羈臣。殷士皆登用。黃公獨隱淪。黍離興歎切。麥秀入歌頻。牢落征途上。飄零雨水濱。時艱憐子孝。歲儉感妻仁。我羨陶元亮。人誇賀季真。如何遽凋謝。況乃久遭迍。已矣成長往。哀哉付劫塵。黔婁衾不足。原憲數方貧。筆冢名空在。文場事已泯。行囊猶簡牘。旅冢但荆榛。聽雨嘗連榻。吟風更接茵。玉山涵遠潤。金井漱餘津。白首論交地。黃泉訣別辰。分財悲鮑叔。投轄失陳遵。北海誰求隱。東都罷對賓。向來知己淚。霑灑滿衣巾。

聯句

對菊聯句

翡翠翦秋葉。金瓊鑲寒英。良駢枝競戢戢。植榦紛亭亭。輪暹芳固的礫。鬪媚益晶熒。瑣幽姿匪人造。逸態諒天成。轅傍芽萌蔗。孽乳萼孕懷。溫螿虎縮逗翳。痒蛭枯揭莖。良遲倩颺陣。颯疾役雷輓。輪拏檻互雜。杳跂檻遞紛爭。瑣秋榮恣妮嫫。春粲失嫫媠。瑣瑩奪鵝肪。膩飛攘鷗毳。輕溫韻列帖。疏冗跡祕慰。羈僮

良魏書奉延輔。鄧水滋甘馨。翰締芳笑蘭友。論雅傲梅兄。瑋撼撼感餘鍛。采采怜孤撐。轅譜之已百品。詠之復千名。溫或繁若朝弁。或潔若藍瑛。良或密若飄霰。或燦若羅星。翰或赴若湊輻。或屹若峩屏。瑋或散若甌豆。或聚若輜輶。轅或潤英璜佩。或麗若金籥。溫或鮮如鷺振。或悴如魴頰。良或斥如僕隸。或積如雲。仍翰或翩如春蝶。或熠如宵螢。瑋或偃如簪屨。或昂如氣盈。轅或揚如袂舉。或側如盃傾。溫或盛喜若笑。或衰憂若醒。良或卽階陞立。或俱盆盎升。翰或儕處士逸。或儂節婦貞。瑋或翔疑孔叢。或峙訝鸞停。轅或詫天姥巧。或覘地媪靈。溫朝采有元亮。夕食有屈平。良用酬我嘉節。來踐爾佳盟。翰餽容交錯釘。卮許遂巡行。瑋摘鮮盛梨栗。傾濁饒醪醑。轅起酬足蹂躪。坐嘯腹膨脗。溫陸味萃南品。海腥極東烹。良已暢一朝樂。復哦千古情。溫句奇媿犖确。韻古鏗韶諶。良馳驟闢接武。格鬪掀慶兵。翰味辛薑桂。丑請險魍魅。驚溫懼敵迹。屢屏懾敗眼。頻瞳良籍湜。走且躡郊島。犁復犂。翰尊卑異川岳。清濁分涓涇。瑋遐思時躡胃。凝眸靡睨睛。轅顧慚駑駘力。莫抗騏驥衡。溫四美已云具。二難亦旣并。翰愁去踰激矢。歡來劇抽絝。瑋卽此成放曠。何用困拘倖。良永緝婀娜佩。庶濯塵垢纓。翰

出遊聯句

杪秋劃澄霽。遊思躍然動。良林颺迅而清。川氣漾不滯。翰宿期凌沆瀣。晨集侵矚矚。轅趨程指悠邈。屏務遺空德。源興挾康樂。高志激孟賁。良筆牀黃帽。賈茶竈蒼頭。捧翰放權闌。鷓飛揚帆接。鷓鷗。轅始循並。縣山尋憩橫。江隴源午分魚石。蹤暮合龍阜。踵良谷烟披。繡紗階月踏。流禾翰投院。誇舊知開筵。樂新奉。

轅宵嫌墜露繁曙覺堆嵐重源塔訪湯師銘芝謁先公塚良綵巖何峩岌雨微何龍嵒輸崖寺跣蜿蜒江
檻縈蟬蝶轅藍水碧可通蜀山青忽擁良門羨登龍榮席矜烹鶴寵輸話離憶沉淪語迹愧荒茸轅纓綵
已駢集刀佩亦鞞琤源旣觀朱扉盛復瞰清泉涌良兩礪耳邊來雙峰眉際聳輸虞宅址空存袁墓木已
拱轅委蛇訝客閒叢脞笑僧冗源金繩憇宿倦石林動新竦良大著孕璞玉賢孫耀珪琪輸德邁東家邱
義壓吾邦勇轅堅留馬就紮強別囚脫羣源竟忘漏艇危直遡夜潮洶良滿覆伴器欹顛蹶同駕瑟輸二
賢首騰蹕小子繼跳踊轅江闊水翻翻雲黑天朦朦源甫濟膽固懾決去心益懍良執書拯溺勳誰息扶
億罇輸迹離螭魅驚身出蛟鼉恐轅叩門氣始振卽館語猶恂源儒服漸林立賓墀竟川壑良爭看麟一
角共譽龜五總輸吐辭超鮑謝刮智駕晁董轅舫齋窺曩楹蘭室睇今拱源困僮屏屢觸醉侶酒頻唾良
屈伸付蚨螻聚散等蟻蠓輸歸情蕩躍鱗別思眇抽蛹轅筆耕期已駛詩債事尤絀源雲莊充昔贖雲林
跛初僮良唐生竟神駭沈子亦聽悚輸畫軸卷入檐書册收貯籠源聲折向蒼茫矢躍超濛瀕良仰視雲
畔鳶去逐烟中鷄輸到家跳夜屨入室響寒螿轅後會知何時余髮已種種良

九靈山房集卷二十八

辭

和陶淵明歸去來兮辭

余客海上。追和淵明歸去來詞。蓋淵明以既歸爲高。余以未歸爲達。雖事有不一。要其志未嘗不同也。歸去來兮。時不我偶。將安歸。念此生之如寄。忽感悟而增悲。老冉冉其將及。體力歛乎莫追。旁人見余以驚愕。曰影是而形非。望東南之歸路。想兒女之牽衣。顧迷途之已遠。愧前賢之知微。緬懷故山。若蹲若奔。鬱乎松楸。擁我衡門。田園故在。圖書尙存。散襟頽簷。亦有一尊。無囂聲之入耳。無憂色之在顏。比鷓鴣與蠓蚋。固無適而不安。胡出疆以載質。脂余華之間關。奉先師之遺訓。冀國光之一觀。豈禍福之無門。乃一出而一還。因傷今以懷昔。心欲絕而桓桓。歸去來兮。姑放浪以遐遊。既反觀而內足。復於世以何求。使有榮而有辱。寧無樂以無憂。匪斯世之可忘。懼夫人之難疇。我之所歷。如水行舟。始欲傾於灘瀨。終倚泊乎林邱。視末路之狂瀾。覩薄俗之橫流。知此來之幸濟。誠祖考之餘休。已矣乎。富貴真有命。利達亦有時。時命未至。誰爲留。歲云莫矣。今何之。古人不可見。來哲亦難期。逐猿鶴以長往。俯隴畝而耘耔。歌接輿之古調。和淵明之新詩。爲一世之逸民。委運待盡。蓋無疑。

五言古詩

和陶淵明雜詩十一首

大鈞播萬類。飄忽如風塵。爲物在世中。倏焉成我身。弟兄與妻子。於前定何親。生同屋室處。死與邱山鄰。彼蒼無私力。宵盡已復晨。獨有路旁堠。長閱往來人。

憶昔客吳山。門對萬松嶺。松下日行遊。況值長春景。竭來臥窮海。時秋枕席冷。還同泣露蛩。唧唧弔宵永。豈無棲泊處。寄此形與影。行矣臨逝川。前途無由騁。以之懷往年。一念詎能靜。

羲馭不肯遲。榮悴詎可量。舉頭望穹昊。日月已宿房。隕霜凋衆類。慘慘未渠央。李梅忽冬實。又復值愆陽。物化苟如此。祇亂我中腸。

遜默度危時。無如莊與老。膏火終受焚。樽櫟庶自保。我昔獻三策。論辨吻常燥。一聞倚伏言。頗恨歸不早。此理端足信。明月耿中抱。愁絕舊同袍。學廣未聞道。

我無猛烈心。出處每猶豫。或同燕雀棲。或逐梟鸞翥。向焉固非就。今者孰爲去。去就本一途。何用獨多慮。但慮末代下。事事古不如。從今便束裝。移入醉鄉住。醉鄉固云樂。猶是生滅處。何當乘物化。無喜亦無懼。東漢有兩士。幼安與程喜。爰得交友心。知音乃餘事。伯牙絕其絃。豈亦會斯意。如何百代下。不與昔人值。涉江採芳馨。頽波正奔駛。四顧無寄者。三嗅復棄置。

唐堯忽以遠。遣風寢褊迫。子陵識其機。竟別洛陽陌。自非大聖人。誰能試堅白。長嘯望前途。宇宙乃爾窄。徘徊東海上。庶遇煙霞客。此事已荒唐。且向環中宅。

朝耕谷口田。暮採陌上桑。歲晚望有收。嗟哉成秕糠。白頭去逐食。所謀惟稻粱。嗷嗷天海際。何異鴈隨陽。昨宵得奇夢。可喜復可傷。爲言東海上。卻粒有其方。早晚西王母。酌以瑤池觴。天地有常運。陰陽無定端。夏蟲時不永。安覩歲月遷。嗟我在世中。倏忽已華顛。何能得仙訣。拾取朝霞滄。蓬萊去此近。欲往無由緣。從今棄諸事。盡付悟真篇。

秦灰未遽冷。於古何所稽。前行有衢路。往往變巖崖。我來一問津。感歎傷人懷。是道在天地。大可六合彌。諸儒拾煨燼。破裂日愈離。遂令高世才。放蕩莫控羈。時無洛中叟。此事諒終虧。文武久不作。周德日以涼。老聃隱柱史。莊叟避濠梁。正聲淪鄭衛。禮俗變邇鄉。是來談治道。夏蟲以鳴霜。悠悠遡黃唐。古意一何長。

和陶淵明擬古九首

皎皎雲間月。濯濯風中柳。一時固云好。相看不堅久。我昔途路中。談笑得石友。殷勤無與比。常若接杯酒。當其定交心。生死肯余負。一朝臨小利。何者爲薄厚。平居且尙然。緩急復何有。撫劍從羈役。歲月已一終。借問所經行。非夷亦非戎。中遭世運否。言依蓋世雄。塵埃縱滿目。肯污西來風。舉世嘲我拙。我自安長窮。孤客難爲辭。寄意一言中。白日忽已晚。流光薄西隅。老人閉關坐。慘慘意不舒。日月我戶牖。天地吾室廬。自非奪元化。此中寧久居。今夕復何夕。涼月滿平蕪。悠悠望去途。歎息將焉如。

我昔年少時。高視隘八荒。惟思涉險道。誰能戒垂堂。南轅與北軌。所歷何杳茫。一旦十年後。盡化爭戰場。豈無英雄士。幾人歸北邙。撫此重長歎。壯志失軒昂。歛退就衡宇。蹙蹙守一方。往事且棄置。身在亦奚傷。圭玷猶足磨。甑墮不可完。素行有一失。誠負頭上冠。孔門諸弟子。賢者是曾顏。超然季孟中。窮達了不關。我嘗慕其人。相從叩兩端。形影忽不及。咄咄指空彈。取琴置膝上。以之操孤鸞。寸心固云苦。中有千歲寒。天運相尋繹。世道亦如茲。王孫泣路旁。寧似開元時。所以古達人。是心無磷緇。弁髦視軒冕。草澤去不疑。西方有一士。與世亦久辭。介然守窮獨。富貴非所思。豈不瘁且艱。道勝心靡欺。恨無史氏筆。爲君振耀之。誰是知音者。請試絃吾詩。

勸君勿沉憂。沉憂損天和。尊中有美酒。胡不飲且歌。我觀此身世。變幻一何多。無相亦無壞。信若空中花。戚戚以終老。君今其奈何。

故國日已久。朝暮但神遊。誰謂相去遠。夙昔隘九州。此計一云失。坐見歲月流。歲月未足惜。恐遂忘首邱。在昔七人者。抱節去衰周。不遇魯中叟。履跡將安求。

牆頭有叢菊。粲粲誰復採。蹉跎歲年晚。香色日以改。我欲一往問。渺渺阻烟海。遙知霜霰繁。莖葉一余待。亦既輕去國。已矣今何悔。

和陶淵明飲酒二十首并序

余性不解飲。然喜與客同倡酬。士友過從。輒呼酒對酌。頽然竟醉。醉則坐睡終日。此與陶然。壬子之秋。

乍遷鳳湖酒既艱得客亦罕至湖上諸君子知余之寡歡也或命之飲或饋之酒行遊之暇輒一舉觴飲雖至少而樂則有餘因讀淵明飲酒二十詩愛其語淡而思逸遂次其韻以示里中諸作者同爲商榷云耳。

今晨風日美吾行欲何之平生慕陶公得似斜川時此身已如寄無爲待來茲況多載酒人任意復奚疑山顛與水裔一觴歡共持

好鳥不鳴旦好水不出山入冥而止坎古亦有遺言所以彭澤翁折腰愧當年不有酣中趣高風竟誰傳淵明曠達士未及至人情有田惟種秫似爲酒中名過飲多患害曷足稱養生此生如聚沫忽忽風浪驚沉醉同無益不醉亦何成

一鳥乘風起逍遙天畔飛一鳥墮泥塗嗷嗷鳴聲悲升沉亦何常時去兩無依我昔道力淺磬折久忘歸邇來解其會百念坐自衰惟尋醉鄉樂一任壯心違

昔出非好榮今處非避喧中行有前訓恐遂墮一偏商於四老人遺之在西山朝歌紫芝去暮逐白雲還當其扶漢儲亦復吐一言

紛紜世中事夢幻無乃是方夢境謂眞既覺境隨毀豈惟世事然我身亦復爾請看竺乾書此語諒非綺幽蘭在浚谷衆卉沒其英清風一吹拂卓然見高情萬物皆有時泰至否自傾蟄雷聲久闕未必先春鳴有酒且歡酌何用歎此生

三春布陽德。萬物發華滋。凌霄直微類。近亦附喬枝。低迷衆無覩。高出乃見奇。煌煌九霄中。榮夸遽爾爲。我道似不爾。一笑懸吾羈。

我卜山中居。柴門林際開。湖光并野色。一一入吾懷。勿言此居好。殆與素心乖。越鳥當北翔。夜夜思南棲。蛟龍去窟宅。常懷蟄其泥。此土固云樂。我事寡所諧。惟於酣醉中。歸路了不迷。時時沃以酒。吾駕亦忘回。悠悠從羈役。故里限東隅。風波豈不惡。遊子念歸途。朝隨一帆逝。暮逐一馬驅。如何十舍近。翻勝千里餘。在世俱是客。且此蒼吾居。

我如北塞駒。因此東南道。有力不獲聘。長鳴至於老。苒苒陰陽移。萬物遞榮槁。既無騰化術。此身豈長好。一朝委運往。恐遂失吾寶。何當攜麴生。縱浪遊八表。

靡靡歲云晏。此已非吾時。深居執蕩志。逝將與世辭。破屋交悲風。得處正在茲。握粟者誰子。無煩決所疑。道喪士失己。節義久吾欺。於心苟不愧。窮達一任之。

世間有真樂。除是醉中境。可能得美酒。一醉不復醒。陶生久已沒。此意竟誰領。東坡與子由。當是出囊穎。和陶三四詩。粲粲夜光炳。

里中有一士。愛客情亦至。生平不解飲。而獨容我醉。我亦高其風。往還日幾次。爾汝且兩忘。何知外物貴。尙懼數見疏。淡中自多味。

老我愛窮居。蒿蓬荒繞宅。與世罕所同。車馬絕來迹。寓形天壤內。幾人年滿百。顧獨守區區。保此堅與白。

若復不醉飲。此生端足惜。

大男逾弱冠。粗嘗傳一經。小男年十三。玉骨早已成。亦有兩女子。家事幼所更。女解事舅姑。男可了門庭。悉如黃口雛。未食已先鳴。此日不在眼。何以慰吾情。

五十知昨非。伯玉有遺風。而我豈謂然。野蓬生麻中。年來更世患。頗悟窮與通。所失豈魯寶。所亡非楚弓。棲棲徒旅中。美酒不常得。偶得弗爲飲。人將嘲我惑。天運恒往還。人道有通塞。伊洛與瀍澗。幾度弔亡國。酒至且盡觴。餘事付默默。

結交數丈夫。有仕有不仕。靜躁固異姿。出處盡忘己。此志不獲同。而我獨多恥。先師有遺訓。處仁在擇里。懷此頗有年。茲行始堪紀。四海皆兄弟。可止便須止。酣歌盡百載。古道端足恃。

陶翁種五柳。蕭散本天真。劉生荷一鍤。似亦返其淳。步兵哭途窮。詩思日以新。子雲草太玄。亦復賦劇秦。四士今何在。賢愚同一塵。當時不痛飲。爲事亦徒勤。嗟我百代下。頗與四士親。遙遙涉其涯。斂然一問津。但懼翻醉墨。汙此衣與巾。君其恕狂謬。我豈獨醒人。

和陶淵明移居二首并序

余去歲六月。遷居慈溪之華嶼。迄今逾一年。僻處寡儔。頗懷鳳湖俗士之盛意。欲居之。後遊其地。得錢仲仁氏山齋數椽。遂欣然徙家焉。因和此二詩。以呈仲仁。

昔我客華嶼。古寺分半宅。窮年無俗調。看山閱朝夕。如何舍之去。遙遙從茲役。朋遊方餞送。賦詩仍設席。

共言新居好。今更勝疇昔。高歌縱逸舟。持用慰離析。
我未踐斯境。已賦考槃詩。懷此多年歲。一廛今得之。
陶翁徙南村。言笑慰相思。斗酒洽鄰曲。亦有如翁時。
投身既得所。何能復去茲。鷓鴣一枝足。古語不余欺。

和陶淵明歲暮答張常侍一首

長蛇驚赴壑。逸騎渴奔泉。歲月亦如是。吾生復何言。
容鬢久已衰。矧茲憂慮繁。俯仰念今昔。其能免厥愆。
馬老猶伏櫪。鳥倦尙歸山。一來東海上。十載不知還。
竟如庭下栢。受此蔓草纏。莖葉日已固。何有挺出年。
人生無定在。形迹憑化遷。請棄悠悠談。有酒且陶然。

和陶淵明連雨獨飲一首并序

吾居海上。旅懷鬱鬱。方錢諸地主。時饋名酒。慰此寂寥。
悶至輒引滿獨酌。坐睡竟日。乃和此詩以寄。平生不解醉。
未飲輒頽然。近賴好事人。置我嵇阮間。一酌憂盡忘。
數斟思已僊。似同曾點輩。舞此風雩天。人道何所本。
乃在羲皇先。如何末代下。莫挽瀟風還。淫雨動連月。
此日復何年。履運有深懷。酒至已忘言。

和陶淵明詠貧士七首并序

余居海上之明年。適遭歲儉。生計日落。飢乏動念。況味蕭然。
乃和此七詩。以寄鶴年。且邀同志諸公賦。鳥鵲失其羣。
棲棲無所依。豈不遇良夜。誰共星月輝。兩翮已云倦。
何力求奮飛。遙見青松樹。決起一來歸。孤危正自念。
復慮歲晚飢。苟遂一枝託。安知溝壑悲。

大道邈難及。我已後羲軒。代耕非所願。十年躬灌園。晨興當抱甕。破突寒無烟。寥寥千古心。豈暇相磨研。
鳳兮有遺歌。三歎諷微言。餘生倘可企。託知此前賢。
永夜寒不寐。起坐彈鳴琴。清哉白雪操。世已無知音。座上何所有。五窮迭相尋。呼酒欲與酌。塵壘屢罷斟。
簞瓢世所棄。鼎食衆爭欽。固窮有高節。誰見昔賢心。
長吟望穹昊。煜煜明降婁。時秋屬收斂。此願竟莫酬。自余逢家乏。歲月幾環周。姬公忽以遠。白屋終懷憂。
我豈忘世者。嗟哉誰與儔。伯夷本不隘。此說君當求。
陶翁固貧士。異患猶不干。公田足種秫。亦且居一官。我無半畝宅。三旬纔九餐。況多身外憂。有甚飢與寒。
委懷窮櫬下。何以開此顏。清風颯然至。高歌吾掩關。
傲居當陋巷。舉目但蒿蓬。豈忘翦刈心。家窶罕人工。且茲當苦節。竊附楚兩龔。其人不並世。茲懷誰與同。
有榮方覺辱。無屈豈求通。適值偶耕者。欣然將往從。
疇昔解塵鞅。撫劍遊東州。飢劬十年久。遂與樵牧儔。世人見不識。翳然成俗流。子廉感妻仁。靖節爲子憂。
因念南歸日。此責復難酬。吾事可奈何。終以愧前脩。

題巽上人遊息軒

名山鬱岩嶢。飛軒起宏敞。覺花墮檻明。忍草緣堦長。日落萬壑冷。風振百泉響。掃庭驅虎出。倚欄延月上。
雲影共棲息。山光同偃仰。晚磬度筠清。夕窗含澗爽。偶造幽人境。獲陪芳景賞。談元悟道言。觀妙滅塵想。

良遊雖暫適。多累詎長往。所以俗中人。昏昏在天壤。

次韻答張靜虛

天運無停晷。星紀奄已中。悠悠悲逝景。靡靡慚化工。貞操失蒼蒨。弱植謾葱龍。益壽乏丹木。養生疑絳宮。仙遊時旣晚。歲行歲屢終。驚塵歎斐斐。駭浪聽泱泱。魯連寧蹈海。殷浩第書空。庶思抱微尚。豈謂表孤忠。於焉遇鄉耆。久亦隱牆東。形類啄苔鶴。心同避弋鴻。觀器驗覆屛。察人識盈冲。常時被芳訊。及茲聆緒風。聆柎彰愛昵。列飲慰羈窮。蘭卮遵近約。綺席示前豐。篤顧荷吟伯。陪次辱文雄。談諧重珠玉。榮願薄苓通。揆情情已愜。卽道道已隆。孤葩耀霜逕。獨鶻奮秋嵩。昔聚動春作。今離觀歲功。繁翰承存故。希聲忸聽聰。誠言非外獎。德意自中充。嗚嚶固睦耳。躡步當省躬。寡和難爲繼。淑貺豈所蒙。屬美謝巴曲。撫志愧南翁。

觀雨憶竹梅翁

陽景蔽秋節。愁霖久未收。旣騰舜江水。亦涌秦湖流。朝旦振衣起。言登川上樓。兩目固云曠。撫事多離憂。爲懷我儔侶。年大雪盈頭。近緣促官課。滯彼海東州。滴液入庭潤。鹽烟當座浮。行潦作蹊逕。沉泥壅道周。跬步不能出。兀若坐虛舟。得似客遊日。長途騁驂騑。

九靈山房集卷二十九

七言律詩

秋日書懷

獨對欄干首藉盤。入秋兩鬢轉斑斑。長途自覺衰難任。故國誰令老未還。猶喜病妻安久困。只憐弱子歷多艱。有書若報征徭事。又遣新愁損舊顏。

七夕有感

聞道長安安全盛時。年年此日是佳期。九華燈下來王母。百子池邊宴咸姬。青鳥只今無信至。綵樓何處賞心虧。不須更向天河望。涼月悽人雙淚垂。

九日感傷先人下世忌

常年九日倍悲秋。況在長途獨倚樓。手種白楊何處是。頭簪黃菊此生休。悠悠歲月祇添老。靡靡湖山已倦遊。只有思親雙淚眼。寒江忍付水東流。

寄鶴年

衡門之下可棲遲。且抱遺經住海涯。東漢已編高士傳。西方仍誦美人詩。衰年避地方蓬轉。故國傷心忽黍離。天末秋風正蕭瑟。一鴻聲徹暮雲悲。

寄天淵老禪時住二靈

路入錢湖是二靈。玻璃影裏樹冥冥。木杯幾渡源頭水。貝葉長翻笈內經。禪室夜開容虎臥。法筵朝講使龍聽。何時去結東林社。待看曇花瑞世青。

梅簷爲天敘師賦

上人昔住大梅山。坐看簷梅眼欲穿。白足亂迷行道日。寶花輕墮講經天。肯將素服欺塵夢。只許清香入梵筵。看到常師成熟後。始知此道有真傳。

有懷淬用剛賦此以寄

何處名山擅地靈。雨微峯下樹青青。九天石落疑星化。一夜龍歸挾霧腥。禪窟已鐫新賜翰。法函惟啓舊藏經。道人猶恨居山淺。杖錫時時入杳冥。

寄郁文海長老

每追杖錫向東臯。渾似天台訪石橋。結社自慚非栗里。能詩誰說避參寥。金華洞古行歸隱。檀特巖深久見招。只恐燕鴻相背後。高情□□□□□。

遲九思不至

老我飄零此海湄。故人別去竟愆期。道途正遠誰相慰。歲序幾何成久離。白月墮梁頻夢想。清風啜茗重懷思。長卿多病尋常事。莫爲當爐出每遲。

寄駱以大

先生節操古人同。每歎清時老不逢。東海眼穿華表鶴。西風淚盡鼎湖龍。家貧已覺交遊少。地僻應忘禮數慵。獨有風塵老羈客。時時杖屨許相從。

寄紀宗正

一別故人雲水遙。相思徒使寸心勞。長卿病肺偏能賦。楚客憂時謾作騷。龍臥山深風氣聚。虎蹲巖近海氛消。但令兩地宜耕釣。白首何嫌不見招。

寄胡仲孚

客裏遊從近十年。一時朋舊羨君賢。學通上古長桑術。道悟南華散樸篇。交久直看書似筍。愛深時借筆如椽。白頭歸倚西風立。一度相思一惘然。

寄宋廷臣

憶昔邀遊多士間。江城幾度共盤桓。眼穿東海蓬萊殿。人老西風苜蓿盤。郢國善歌稱宋玉。唐朝能賦愧方干。如今寂寞空山裏。脉脉無言心自酸。

寄方盛齋

蕭灑高人若箇邊。竹籬長繫泛湖船。畫圖樓閣蒼波外。錦繡園林白髮前。每向桃源尋舊隱。渾如蓬島見真仙。只今遠道成惆悵。何日重來說往年。

寄錢仲仁

龍山西畔鳳湖東。渺渺三樓沉壑中。人似謫仙唐李白。世推高士漢梁鴻。爲憐桃浪迷歸路。曾結茅廬近
達蓬。自是勝緣難強致。敢臨弱水怨回風。

寄方梧竹

蛟門北去更誰賢。兩鬢蕭蕭入暮年。手種碧梧堪引鳳。庭移翠竹已參天。孟嘗襟抱知誰識。杜老詩章只
謾傳。多愧君情無以報。海鄉何許思綿綿。

寄胡宗器

溪上先生誠足悲。胸中落落有誰知。講經合據臯比座。逐食翻疑里社師。年少賈生空抱志。數奇李廣實
關時。漂流固重衰年憶。當路吹噓豈有之。

承君衡叔幹遠送賦此以別

長風吹度海東邊。慣聽潮聲已十年。往事免成塵撲面。新愁惟有雪盈顛。半生望眼迷遼鶴。一夜歸心到
蜀鷓。遠賦驪駒慚二妙。縱歌安得酒如川。

寄羅彥直

畫舫高齋起澗阿。米家畫畫貯來多。清風時至自舒卷。俗客不來誰嘯歌。千里故人嗟我老。一時交友奈
君何。祇應別後增惆悵。頻寫新詩待鴈過。

寄孫伯敬兄弟

誰似君家好弟兄。生平友愛早知名。事同王勃三珠樹。義比田真一紫荆。杖履幾回尋隱德。墳饒每荷慰
羈情。顏堂近製怡顏號。愧乏長才爲勒銘。

寄揭平仲

祖父箕裘絕代無。玉堂金馬漢諸儒。滇池自昔多龍種。丹穴于今見鳳雛。學術要須供世用。文章豈但飾
皇圖。從來大器成當晚。莫歎揚雄臥一區。

聞平仲有還鄉之志感念之餘爲賦四韻

廿年不到文安墓。早夜能忘返故居。獨奈慈親愁遠道。更堪旅櫬冷荒墟。治行況復無餘橐。恤患誰能露
駕車。吾道艱虞今若此。白頭相視淚潸如。

寄胡舜咨

會著宮袍賦上林。一朝歸臥白雲深。昂昂老鶴鳴臯態。耿耿鴻鵠避弋心。病起尙餘頒送藥。客過時共賜
來金。鄉邦珍重斯文寄。莫爲愁多鬢雪侵。

寄黃炳文

四明朱學有誰傳。爾祖淵源已百年。世澤豈徒遺簡在。家風親覩遠孫賢。山中風雨龍歸後。海上蓬萊鳥
去前。可是地靈鍾秀美。兩雛又復起蹁躚。

寄張天民

於越山中張左轡。平生出處絕堪悲。爲慚柳下甘三黜。竟逐梁鴻賦五噫。紫陌縱榮心似鐵。黃金久盡髮成絲。更憐一種清奇病。癩髓鸞膠不可醫。

寄茅元禮

此老胸藏萬卷書。論才只合上公車。長途何事妨騏驥。美草頻年飽駉驢。斗室深居來客少。一牀兀坐老僧如。邇來却爲栖栖者。尊酒風流樂有餘。

寄俞伯熊兼柬李仲彬

東郭先生最老成。天才久已負時名。能詩不減唐工部。解飲渾如晉步兵。塞上征鴻高避弋。海東歸鶴暗聞聲。比鄰喜有知心客。一夜彈碁直到明。

寄鄭彥博

禮帙初攜入奉常。濯纓又復向滄浪。匡時未必慚長策。撫事無如歸故鄉。雨釣海頭機已息。雲耕谷口髮俱蒼。客來若也詢餘計。題得新詩滿草堂。

秦湖隱居

西浙風光不及前。攜家避地到秦川。雲山每憶嚴公釣。月夜時迴賀老船。門巷邊衢塵似海。樓臺近水影浮天。旁人莫問心中事。洗濯除非是酒泉。

懷宋庸菴

麥秀歌殘已白頭。逢人猶自說東周。風塵瀕洞遺黎老。草木凋傷故國秋。祖述念時空擊楫。仲宣多難但登樓。何當去逐騎麟客。被髮同爲汗漫遊。

伏承靜虛翁以所和詠貧士詩見寄爲賦四韻

先生閱世近期頤。鶴骨稜稜鶴髮垂。法律舊窺唐制作。衣冠今覩漢威儀。桓榮賜杖空前志。掌故傳經已後時。獨有陶潛千載恨。品題都屬寄來詩。

懷滑櫻寧

海日蒼涼兩鬢絲。異鄉飄泊已多時。欲爲散木居官道。故托長桑說上池。蜀客著書人豈識。韓公賣藥世偏知。道途同是傷心者。只合相從賦黍離。

懷宋思賢

世間風雅久陵遲。此事惟君蚤得之。遺響直憑東漢續。流波奚用晚唐爲。後先作者皆殊列。得失中心只獨知。白首低垂方抱愧。敢要佳句賦睽離。

懷項彥昌

渭樹江雲每憶君。別來惟見白頭新。百年誰是知心者。千里同爲歎世人。內景琴心篔簹谷。夜。外丹火候杏園晨。極知養道多餘暇。何得長生及老身。

王國臣以龔翠巖先生所畫梨樹幽禽圖見贈賦此

爲念閒情愛此圖。錦囊卷送結交初。槎枒玉樹君應似。宛轉珍禽我不如。人物旣爲時膾炙。才名眞作世璠瑒。客途獨愧情難報。感謝當傳百代餘。

宗道師曾許尋鄭元秉春草圖見寄詩以促之

平生不識鄭山輝。寫草成圖偶見之。恍惚鷺羣翻水日。依稀鴻爪印沙時。康成已矣空書帶。靈運悽其但夢池。寸楮尺綃能寄否。敢憑去鴈致深期。

近造嚴宗道蒼雲軒見宋庸菴壁間舊題因借韻嗣賦

先生去隱富春山。贏得聲名滿世間。往事只今成變滅。荒祠終古倚孱顏。九霄共覩冥鴻遠。千載誰聞海鶴還。自是賢孫知述德。故題軒宇領餘閒。

承德輝漢章二高士遠顧賦此以寄

客裏神交近十春。江雲梁月幾懷人。何言此日襟期合。轉憶當年製作新。朋好忝居三益友。別情能忘兩吟身。及秋倘失乘槎路。定向滄江一問津。

葉孔昭爲尊公刊海堤集喜而有作

翁昔爲州建土功。石堤萬丈海爭雄。歌謠德美南陽似。紀載文成吏部同。要見流傳千載遠。肯教零落百年中。誰家有子賢如是。手把新編喜未窮。

哭趙太初

蒲團兀坐幾經春。獨把南華味道真。已薄丹砂勾漏令。定憐白髮杜陵人。山中舊別期猶在。世上遊從跡竟陳。楚些吟成無處寄。暮雲回首泣沾巾。

哭張宣仲

一別逡巡十五年。可堪回首隔重泉。高齋謾起延徐榻。遠道誰來訪戴船。述德無聞嗟我老。承家有道賴孤賢。自從凶訃傳天末。獨立楓林幾泫然。

承李仲彬遠顧賦此贈別

前朝白髮舊臺郎。十載攜家住海鄉。每爲不才迂劍佩。致令多處識冠裳。冥鴻已遂天衢闊。退鷁方愁江路長。地迴秋高形影獨。祇應別後轉淒涼。

懷陳中復

天漢迢迢幾問津。乘槎路斷海東濱。諮詢不見皇華使。喪亂甘爲皓首人。閤相丹青方致譽。杜陵詩句謾傳神。芙蓉峰下芝堪食。已約他年共結鄰。

蔣彥章來訪別後懷之

會稽山下正黃昏。布襪芒鞋何處村。無復霜臺觀獬豸。每從雨甸放雞豚。功名久已成澌盡。節操由來與世存。久說首陽薇可采。爲歌遺事却消魂。

示唐生林

別來想不廢書檠。簾幙秋風入夜清。箋註肯同細帙蠹。飛騰能負練囊螢。終軍英妙方年少。庾信摧頽謾老成。拭目早令觀豹變。雙親頭白久含情。

題高節書院

萬丈層崖置屋牢。子陵塚墓壓靈鼈。繞庭雲氣皆山雨。滿壑風聲是海濤。隱德昔煩天使下。祠光今並客星高。回頭却憶當年事。幾度春陵鬼夜號。

訪楊季常於陳山回途有述

爲憶幽人八十餘。片帆來訪水南居。已知揚子門多酒。誰信馮驩食有魚。一代定歸名士傳。百篇直授伏生書。前朝人物今無幾。獵罷猶堪載後車。

詠懷古迹

客來慎勿說姑蘇。弔古令人百感俱。已訝當年嘗越膽。更堪此日聽吳趨。荒臺鹿下江聲咽。古木烏啼月影孤。欲問闔閭埋葬地。五湖東畔已荒蕪。

哭陳夷白二首

白髮江湖一病身。平生精力瘁斯文。師門偉器今餘幾。藩國奇才獨數君。共愛辭華追董賈。肯將出處累機雲。生芻不到黃瓊墓。目極五湖西日曛。

老我歸來託遠林。仙槁猶泛五湖深。身名已喜全離亂。生死俄聞變古今。懸榻空餘徐穉恨。絕絃真亂伯牙心。無端又向溪橋立。望斷秋鴻淚滿襟。

喜謝密菴至二首

自昔王門久曳裾。河間禮樂屬真儒。宮袍已織雲爲錦。旅食真成饌有魚。轉首俄驚蒼狗變。傷心忍對劫灰餘。白頭野客欣重見。爲問風流似舊無。世外逍遙已十春。更無魂夢到黃塵。也知一別成陳迹。忽漫相逢恐後身。英邁尙餘標格在。驅馳祇益髮毛新。古來名士多藏器。臨臥東山代有人。

伏聞楊宋二先生及應平仲出遊且言回舟見顧喜而有述

前輩凋殘半九原。一時文采尙誰賢。楚推宋玉偏能賦。蜀有揚雄正草元。鳧鳥忽飛雙羽翰。鷁舟真載兩神仙。同遊況得尋源客。定覓秦人到石川。

聞耕隱庸菴諸公遊山累日用深歎羨

拋却江湖舊釣竿。客窗聊復理遺編。心疲朱墨頭如雪。志困生徒日似年。川泳謾誇秦故迹。山遊能似晉諸賢。西風久動歸與歎。此日因君重惘然。

九思發背彌月心甚念之忽得安字喜而有賦

甫及衰年已二毛。入秋一病轉蕭騷。自緣宗澤憂時切。莫是文園作賦勞。餌液若爲和瀨髓。錦囊誰解致

鸞膠曉來忽覩平安字。老筆縱橫氣尙豪。

五言長律

秦湖漁隱爲袁桂芳賦

履運已成昔。名湖尙說秦。避時端有意。把釣可無人。若士居姚水。遺風似舜民。地雖占越上。境實慕河濱。已忝歸漁業。何言託隱淪。月浮孤艇夜。雨著短蓑春。泊渚多依藻。窺汀或傍筠。羽沉疑中餌。絲動訝拖鱗。竭澤知難脫。殃池數已屯。競多聲失厲。得雋語忘嗔。癩怨誅求盡。龍嫌蕩漾頻。腥風連巷陌。穢浪接沙塵。水際呼兒急。牆頭換酒新。謳歌便野習。嗜好任天真。行媿清狂客。名傳放逐臣。家臨烟浦近。門對雪鷗馴。釣渭心徒苦。舉周跡已陳。子陵辭漢日。賀老別唐辰。事業今如是。棲遲固足珍。青雲人旣遠。白首我還親。衰謝無知己。飄零偶問津。但期連郡邑。豈料結比鄰。東主方懸榻。西風且釣緡。扁舟如可見。同老此湖濱。

九靈山房集卷二十

外集

九靈先生畫像贊

金華宋濂

其神之清。秋高露寒。而青田鶴鳴也。其氣之溫。光含輝潛。而充然如赤瓊也。其文之昭。益盎紛如。而古蠶洗獨精明也。具此三美。所以斂英毅而集衆長。葆醇熙而孚羣情也。懿哉斯人。蓋智遍乎物。行飾乎躬。而學本乎誠者也。

前題

宋濂

窅乎其凝者。以道爲家。燭乎其澤者。振德之華。悄然而深思者。所以周其變。沛然而大肆者。又將暢其葩。是皆世之所知也。至於困而亨。窮而泰。齊喜戚於夢幻。棄利祿猶泥沙。吾欲從而究之。已莫辨其津涯。況可得而贊耶。

余三十年間。兩贊叔能之像。辭各異焉。以見叔能年既高而德愈進也。因令侍史并書之。前翰林學士、金華宋濂記。

前題

浦江鄭濤

志慮高潔。秋水寒潭。器局嚴整。峭壁危巖。峻不可踰。靜無弗涵。是謂德人。爲衆之瞻。

前題

鄆陽周伯琦

懿茲麗仙金華之英。造道自得。脩辭立誠。持樂之和。乘衡之平。出處備然。風月同清。

前題

金陵楊翮

溫溫乎容貌之可卽。抑抑乎威儀之有嫩。跡雖寄乎朝著。而與充拙者殊科。志常慕乎山林。而與矯崛者異軌。長松之陰。消搖曳屐。人殆疑其爲遯世之逸民。而不知其爲抱道之君子。吾嘗觀其飭躬而操踐端實。續言而論著宏侈。可謂其行則儒。其文則史者矣。

前題

臨海陳基

仁義爲飭身之本。忠信爲奉國之基。發爲文章。其聲也希。天將以斯人鳴太平之盛。必使翔而後集。覽德輝而下之。若人也。其視時爲去就。而以道爲樞機也耶。

前題

金華胡翰

安履其素。不做以肆志。廓通其變。不苟以阿世。龔乎蚤歲之繁華。藹乎前脩之氣味。人方睹紫芝於眉宇之間。吾將求叔度於言論之外也。

前題

義烏王禕

蕭蕭乎冰雪之姿。濟濟乎山林之服。萃和氣以中充。藹高標而外肅。雖著述之富。有年於茲。而進脩之功。惟日不足。庶幾儒林文苑之間。繼昔賢之芳躅。吾安得爲之執鞭。參翺翔而追逐。

前題

蘭溪吳沈

仙華之峰鬱乎蒼蒼。儲英孕靈。粲然文光。偉才賢之迭興。接踵武而相望。有美君子。粹如圭璋。言若不出口。而其文則有千里朝宗之勢。貌若不勝衣。而其志則有百鍊不折之剛。玩天機之流動。集藝苑之芬芳。觀其用心。蓋將追古人而頡頏者也。夫身之退者德必進。跡之晦者名必揚。造物者既俾若人以絕出之長。則必使之鳴國家之太平。和儀鳳之鏗鏘。豈肯置之於山林泉石之鄉也耶。

前題

浦江鄭淵

皤皤溫溫。如三春曦。是公德容之腴。炳炳彪彪。如泰山芝。是公文藻之輝。此固足見其著外之美。而不知其中自得之妙。殆將追孔孟而爲師。是以操七寸之觚。以開蒙蔀於學苑。破萬卷之書。而獵精華於道機。蓋不屑於詞人藝士之爲。而直欲由伊洛而遡泗沂也。

前題

永嘉張士諤

神清氣溫。乃道之充。學瀆行卓。爲士之雄。瑟彼和氏之璧。勁哉繁弱之弓。或出或處。與時卑隆。紀甲子見趨舍之正。考春秋窮筆削之正。世之人皆以窮達爲得喪。而不知其特立獨行。契古人之高風。

前題

金華蘇伯衡

九靈先生捐館之八年。伯衡過其鄉邑。從其子禮拜其遺像。追爲之贊曰。

緒接二載之後。道探兩澳之上。卓爾爲人中之英。隱然負海內之望。威儀文采。尙莫能髣髴。精神心術。矧

可以名狀。其跋涉道途也。類子房之報韓。其徬徨山澤也。猶正則之自放。世今若山斗之共仰。公遽駕風。靈而長往。後死者之瞻遺像。安得不慨斯文之將喪也與。

前題

臨安劉中

溫乎其容。維德之充。粹乎其文。維學之純。斯世之人。斯世之珍。吾將與歸。非公其誰。

前題

四明烏斯術

其容粹然。其心靄然。其文沛然。非高視物表。以樂其天者乎。是宜論道廟堂之上。唱道爲儒林之先。胡爲而遜世。顧嘯傲乎風煙。然身遁而名隨。聞之者亦興起而慕焉。

前題

蘭溪徐元

直而溫。寬而栗。處事雖簡。殊無傲色。志乎聖賢之學。充乎君子之德。廓然有容。卓爾有立。究千古之淵微。爲一世之矜式。行當發揮所蘊。以見於世。豈容深處高遜於泉石也耶。

前題

浦江趙友同

才可以濟民。而位弗稱。德可以厚俗。而時弗容。是造物之畜於公耳。然宏辭偉論。所以宜人。文昭聖學。而垂於無窮者。又不可謂不擅其豐也。

前題

豫章黃賓

被山野之裳衣。懷琬琰之文辭。其充然者。豈從人而羸縮。其退然者。亦與道而委蛇。放乎邱壑。襟韻之夷。

曠視幼輿將何用於當世。出乎埃壘。神情之散朗。歎叔夜不可得而同時。

前題

姑蘇姚廣孝

冲然而中虛。脩然而外順。將用於世也。其才良其行瑜。或困於時也。其神完其體紆。若人者實廊廟之具。匪山澤之臞。蓋其於學也。保得康道之妙。詎世俗之可窺。雖摛文弄藻。嘲風謔月。特其緒餘。要當與秦太虛、黃庭堅並駕而齊驅者矣。舍是之外。則非吾可得而知也哉。

前題

蘭溪趙良恭

萃乾坤清淑之姿。無山林枯瘠之氣。其出也。石渠天祿。固爭睹蒼梧翠竹之英標。其處也。茅屋石田。未必減金馬玉堂之高致。淇盧之劍匣藏。則風雨時鳴。琬琰之碧玉蘊。而山川增麗。嗚呼。浦陽人物。耳目之所接者。若容州文學之風雅遺音。蜀山居士之咸韶帝制。至於金春玉應交振而錯陳。則長薊山長後先而並世。率皆騎箕跨尾。而神遊乎上元。鞭霆馭風。以歷覽乎無際。然則狂瀾砥柱之障。誰復任之。而九鼎一絲之懸。凜其可畏。前輩之所作成。後生之所期望。惟君與宋景濂氏而已。

祭雲林先生文

蘇伯衡

斯道與宋俱遷南東。文獻卓然。婺爲之宗。各尊所聞。丕緒大統。風行日臨。山立海涌。有元之衰。耆老淪亡。惟四先生。揚其末光。懿文太史。事明天子。長山華川。內外鼎峙。惟九靈公。遠跡自藏。嬉遊物表。不耀其章。譬諸寶器。致用先毀。顧瞻四傑。喪其三矣。幸公尙存。爲學者師。孰是寡佑。一老不遺。自昔聖賢。莫不有死。

死有可傳。禍福同軌。公之表著。實可不磨。視彼區區。何足少多。前有千祀。後有萬世。百年之間。蓋不必計。人固大化。如冰在川。成壞斯須。烏可控搏。有盡之形。歸諸造物。其無盡者。終古不沒。得失之理。公已無疑。我獨何悲。傷道之微。星辰在上。河嶽在下。孰扶其衰。尙俟來者。嗚呼哀哉。

故九靈先生戴公墓誌銘

趙友同

九靈先生既歿之二十八年。次子樂述其平生行述。來京師授友同曰。先君捐館已久。而墓石未銘。樂年且垂老。恐一旦溘先朝露。是終無以暴其懿美於世。子於先君爲內姪。又嘗有師弟子之分。知先君者。莫若子也。銘烏忍不爲。友同拜且泣曰。是故友同之夙夜不遑自寧者。第念先生乃一代名儒。宜託諸能言之士。以垂不朽。今既久而未有所屬。尙敢以愚陋辭哉。遂敍而銘之。先生諱良。字叔能。姓戴氏。其先杜陵人。十八世祖昭。唐咸通間。任浙之東道五部兵馬大元帥。平南節度使。銀青光祿大夫。檢校太子尙書令。仲子堂。始遷婺之浦江。好馳馬試劍。故名所居里曰馬劍。厥後子孫日益繁夥。樂善業儒。爲縣之望族。曾大父諱錫。大父諱濤。父諱暄。皆隱德弗耀。先生天資警敏。性至孝。母劉夫人病。日侍湯藥。抱持寢興。衣不解帶者逾年。居父母喪。哀毀幾不能生。每遇忌辰。輒嗚咽流涕。處兄弟備盡恩愛。長姪恭。早喪父。教之踰己子。早從烏傷朱震亨先生習醫業。後以其術大顯於時。官至太醫院使。皆先生力也。生平嗜讀書。雖祁寒盛暑。恆至夜分乃寐。故天文地理醫卜佛老之書。靡不精究其旨。初治經。習舉子業。尋棄去。專力爲古文。時柳文肅公貫。黃文獻公潛。吳文貞公萊。皆以文章鳴浙水東。先生往來受業門下。盡得其闡奧。與文

肅公尤親密。公之死。爲經紀其家。持心喪三年始歸。余忠宣公闕。持憲節過婺州。聞先生善歌詩。數相過。從。論古今作者詞旨優劣。公欣然曰。士不知詩久矣。非子吾不敢相語。乃盡授以平日所得於師友者。而先生詩名遂雄視乎東南矣。家居遠城邑。朋遊講習頗夥。卽買地縣西。結屋數十楹。日與同輩討論濂洛性理之微言。家事有無。悉置不問。親黨或勸以營產業。爲子孫計。先生謝曰。子孫貧富。非吾可知。且家世業儒。詩書之外。亦不能有他圖也。居無何。起爲月泉書院山長。後生士子。接其風猷。無不以踐履實學相勸勉。至正辛丑。以薦者擢授中順大夫。淮南江北等處行中書省儒學提舉。然時事已不靖。無可行其志。乃攜從子溫。浮海至中州。欲與豪傑交。而卒無所遇。遂南還四明。四明多佳山水。耆儒故老。往往流寓於茲。先生每相與宴集爲樂。酒酣賦詩。擊節歌詠。聞者以爲有黍離麥秀之遺音焉。國朝洪武壬戌。以禮幣徵先生至京師。卽日召見。試文辭若干篇。命大官予膳。畱會同館。名公鉅卿。見無虛日。甚或以師禮事之。旣而上欲用先生。先生以老病固辭。頗忤旨。待罪久之。一日感微疾。卽爲書謝諸親舊。猶拳拳以忠孝大節爲語。迨疾亟。召樂謂曰。吾罪戾本深。賴聖恩寬貸。獲保首領以死。念無報効。汝等幸自勉。以蓋前人之僇。乃爲賢子孫耳。語畢。遂端坐卒於寓舍。實癸亥四月十七日也。享年六十有七。樂以道遠。不克扶柩南還。乃擇地火化。奉其骨而歸。以是年十一月十五日葬於縣南嘉典鄉西山之原。配趙氏。故宋宗室梅石處士必俊之女。有賢德。先公八年卒。至是合窆焉。子男二人。長禮。本縣儒學訓導。後十三年卒。次卽樂。今爲本縣醫學訓科。女二。長適張琪。次適倪佐。孫男八。孫女三。先生神氣爽朗。美鬚髯。不妄喜怒。終日危坐。

無惰容。與人言必吐露情實。善誘掖後進。嘗以所居在九靈山。晚年自號九靈山人。故學者咸以九靈先生稱之。所著述有和陶詩一卷。九靈山房集三十卷。春秋經傳考三十二卷。藏於家。嗚呼。先生以盛年遭世多故。晚遇聖朝。而迫於老病。故終身莫克伸其志。然志雖不伸一時。而文章之鏗鏘炳耀。所以光前修啓後武。維持斯文。而振其遺緒者。固自足伸於永久也。銘曰。

身之彊也。時則已非。時之逢也。身則已衰。韜英斂華。大昌厥辭。雖不獲薦郊廟。而亦有足樂於山巔水涯。嗚呼。先生之高也。豈後人而無知。

九靈山房集補編卷上

集中遺篇。與載於他書而小異者。謹就所見補之。後有所得。當續增焉。殿泗謹識。

詩

寄宋景濂六首

見宋文憲集○山居叢載
詠體三首。與此小異。

結廬在窮巷。藝藿仍種葵。謂將究安宅。何意逢亂離。三年去復還。鄰室無一遺。我屋雖僅存。藿悴葵亦衰。海田既遭變。井邑還日非。扶杖一行遊。歷覽多所悲。本不居市廛。悔之將何追。山居叢載
體之一

庭前兩奇樹。常有好看色。年年遇雪霜。誰謂寒當易。道喪涉千載。親友誼日薄。既貴乃忘賤。歲晏誰堪托。厭此里中居。行行至吳國。不見新相知。唯聞古時迹。古有延陵子。施恩死逾博。一朝協心許。寶劍非所惜。

此事難再逢。吾行復何適。山居叢載
體之二

辭家獨行邁。捐軀遠從戎。已謂勳可建。如何志無終。主將東南征。桓桓震羣雄。苟乘先登羽。即定一舉功。自非陳力徒。亦可備折衝。制勝兩楹內。設奇樽俎中。獸尙憚爲犧。人豈昧藏弓。況復已多賢。何能奮薄躬。東州有一士。與世亦殊倫。借問何所殊。守賤與安貧。好爵吾不貴。至寶吾不珍。聘幣照閭里。視之若浮雲。灌木荒繞舍。薛荔深擁門。豈忘其靡麗。苟得非所欣。舉世少知者。我獨慕其人。時時往見之。聊用縈心神。願言攜壺約。長與爾爲鄰。

窮居寡人力。繞屋荒草莽。紛紛集鳥雀。寂寂絕輪鞅。病夫亦何爲。呼兒具藤杖。時復林野中。披榛獨來往。田父荷鋤至。相與飲真賞。寧知雨露深。但說桑麻長。人生適意爾。何事蹈時網。

少小秉微尚。遊心在六經。冉冉年華遲。乃與塵事冥。入秋多佳日。何以陶我情。園蔬青可摘。新穀亦既升。命室釀美酒。一壺聊復傾。兒女戲我側。親戚還合并。此事已云樂。吾生豈無成。俯仰百年內。忽如流電熒。

山居藟詠
懷之三

義門詩見麟溪集

唐虞去我遠。偉此薄俗敦。坐徵宋子語。起拜鄭公門。鄭公多孝義。宋子所嘗言。我請咏其精。爲爾一二論。爾先家睦州。中徙此山樊。有類植園木。根多枝乃蕃。曰惟九世祖。秉志何軒軒。高探百聖窟。深斲六籍根。修身以及家。秩秩嚴卑尊。遂令雲仍裔。承顏盡春溫。方其歷四葉。尤篤手足恩。世連屬多虞。羣兒仍構患。當時急難意。鵲鷁而在原。又如融褒輩。爭赴張儉冤。而兄意沈命。慷慨死不難。弟也實歸窆。三載廬邱播。悲動烏鳥集。灑血蒼崖丹。人亦孰不死。媿此季與昆。精誠旣上格。遺澤能我慳。門牆茂棠棣。塔庭盛芝蘭。豈無兄與弟。我其弄篋壙。豈無曾與元。我其同爨燔。宿集謂已殷。內外無或喧。同心與安貞。大字標堂顏。訓辭誠縷縷。規範何閑閑。宛將仁者矛。剜卻不義肝。問胡能致之。詩書惟屢翻。平生菽粟味。肯用飾輪轅。遂浚古禮淵。徹彼異教藩。先將謹喪祭。次可嚴冠婚。我後固已恤。奈此寡與繆。瞻飢及賙寒。米糲朝暮頒。居族暨掩骼。廬冢東西存。末俗凜生風。動爲人所歎。淮浙尙無有。鄉邦真獨觀。爾其敦爾行。持用廉彼頑。

所以明聖朝。天澤常齋沭。請看烏頭表。光輝照門闕。詎曰一家私。藉爾回狂瀾。我嘗觀我人。厥初皆一源。叔兮祖所子。姪也父所孫。只緣混異姓。彼詬來嚙嚙。婦姑且諍語。遑恤同氣殘。終然孝與弟。百行茲其元。豈不悅爾道。困彼舌齟反。惟茲鄭氏子。同具衣與冠。是心何獨殊。此理昭無昏。諒哉剛耿士。不受柔弱吞。羽翼一我備。居室亦我安。棲棲何爲者。感此淚河翻。便將書爾行。付以金石刊。金可爍而渝。石可碎非完。不若歌我詩。傳之閭巷間。庶令儉薄夫。聞此心爲酸。化一以爲十。百萬此其端。澆風或可瀆。古俗亦可還。但恨才力薄。發聲俚且繁。宋子實知我。我辭爾其刪。

永樂寺見寧波府志

舜江東下艤官船。幾聽潮聲任往還。老去未知重到日。夢中唯識舊遊山。秋風飛□來天外。滄海遺珠出世間。爲問爾翁強健否。龍山高絕許誰攀。

九靈山房集補編卷下

文

吳先生哀頌辭序見康熙間刊本○按吳先生卒葬。此序爲核。故附載於此。辭同不重出。

先生婺浦江人。諱萊。字立夫。集賢大學士。榮祿大夫。吳公長子也。重紀至元六年夏四月九日。以疾卒於家。得年四十有四。嘗一試於禮部不中。二子諤謚。至正元年十有一月二十四日。葬先生於盂塢之原。葬後一年。命良爲辭以哀之。良雖不敏。然嘗受學於先生。誼不得辭。乃爲追述平生而爲其文曰。云云。

書天機流動軒卷後見天順間家乘

良盛年時。識函國余忠宣公於浦江官舍。公方持使者節行縣。欲執弟子禮莫可也。後遊郡城。遂因論詩。獲質所疑於公。公爲書此四篆以遺。蓋良所居軒廡也。攜歸山中。鄉友宋君景濂首爲贊一通。且貽書東陽陳君君采記之。而金華胡君仲伸。烏傷王君子充。麟溪鄭君仲舒。皆先後爲文以寄。卽嘗命工刻置軒壁矣。亡何。天下大亂。在在兵起。乃一切委棄。避地海隅。及以垂暮之年。歸視故居。軒雖苟完。而壁間舊刻。無復存者。急探行囊。僅得公所書親蹟。及四君記文。搨本而已。景濂之贊。亦竟不可追踪。卷中跋語。則後所追爲者也。於是公以淮南行省右丞死節。安慶君采以處士死於鄉。入國朝。景濂以翰林學士。責死西土。子充以翰林待制。斥死北地。仲伸亦以儒學教。寄死野人家。同時流輩。凋落殆盡。獨仲舒以前朝故

官家食無恙。然亦頽然老矣。由前至今。俯仰未三十載。而變幻不常如此。所恃以持久者。惟字畫與文章。又未知去此三十載。其字與文與所蓄之人。還能相守如今日否。學佛之人。指幻境爲空華。豈不信然歟。良旣以四篆四記聯之爲卷。而復詳著其始末於後。暇日一取閱之。安得不爲之三歎乎。元默閣茂之歲。夏五月旣望。九靈山人戴良書。

鶴年先生詩集序

見丁鶴年集○與鄧遊原藁小異

昔者成周之興。肇自西北。西北之詩。見之於國風者。僅自豳秦而止。豳秦之外。王化之所不及。民俗之所不通。固不得繫之列國矣。我元受命。亦由西北。而興西北諸國。若回回吐蕃。康里畏吾兒也。里可溫。唐兀之屬。往往率先臣順。奉職稱藩。其沐浴休光。沾被寵澤。與京國內臣無少異。積之既久。文軌日同。而子若孫。遂皆舍弓馬而事詩書。至其以詩名世。則貫公雲石。馬公伯庸。薩公天錫。余公廷心。其人也。論者以馬公之詩似商隱。貫公。薩公之詩似長吉。而余公之詩。則與陰鏗。何遜。齊驅而並駕。他如高公彥敬。獮公子山。達公兼善。雅公正卿。聶公古柏。幹公克莊。魯公至道。二公廷珪輩。亦皆清新俊拔。成一家言。此數公者。皆居西北之遠國。其去豳秦。蓋不知其幾千萬里。而其爲詩。乃有中國古作者之遺風。亦足以見我朝王化之大行。民俗之丕變。雖成周之盛。莫及也。鶴年亦西北人。其視數公差後起。家世以勳業著。而鶴年兄弟俱業儒。伯氏之登進士第者三人。鶴年乃泊然無意於仕。遭時兵亂。逃隱海上。邈不與世接。凡幽憂憤悶。悲哀痛苦之情。一於詩焉發之。觀其古體歌行諸作。要皆清麗可喜。而注意之深。用工之至。尤在於五

七言律。但一篇之作。一語之出。皆所以寓夫憂國愛君之心。閱亂思治之意。讀之使人感情激烈。不知涕泗之橫流也。蓋其措辭命意。多出杜子美。而音節格調。則又兼得我朝諸閣老之所長。故其入人之深。感人之妙。有非他詩人之所可及。嗚呼。若鶴年者。豈向數公之流亞與。然數公之在當時。皆達而在上者也。世之士子。孰不膾炙其言辭。鶴年遭夫氣運之適衰。方獨退處暇隙。而爲所謂窮者之詩。以自慰。其能知夫注意之深。用工之至者。幾何人哉。知與不知。在鶴年未足輕重。第以祖宗涵煦百年之久。致使遐方絕域之詩。俱得繫之天子之國。而鶴年之所以著明。王化民俗之盛。以與數公並傳於斯世者。遂泯無聞矣。不亦重可悲夫。故取其吟稟藁若干卷。序而傳之。以俟世之知鶴年者。相與諷詠焉耳。鶴年之清節峻行。已別有傳。茲不著。至正甲午秋。九靈山人金華戴良序。

夷白齋藁序

見夷白齋集○與吳遊原藁小異

夷白齋藁合四百五十四篇。通奉大夫內史臨海陳先生所著。良既訪之先生。盡得其藁。而編次之。以爲三十五卷。而復序其篇目曰。世道有升降。風氣有盛衰。而文運隨之。故自周衰。聖人之遺言既熄。諸子雜家並起。而汨亂之。漢興。董生、司馬遷、揚雄、劉向之徒出。而斯文始近於古。迨其後也。曹、劉、沈、謝之刻鏤。王、楊、盧、駱之織豔。又靡然於當時。至唐之世。而昌黎、韓子以道德仁義之言起。而靡之。然後斯文幾於漢。奈何元氣僅還。而剝喪戕賊。復浸淫於五代之陋。直至宋之劉、楊。獨務抽青媲白。錯綺交繡。以自衒。後七十餘年。廬陵歐陽氏又起。而靡之。而天下文章復侔於漢唐之盛。未幾歐志弗克。遂伸。而學者又習於當時。

之所謂經義者。分裂牽綴。氣日以卑。而南渡之末。卒至經學文藝。判爲專門。士風頽弊於科舉之業。而宋遂亡矣。文運隨時而高下。概可見矣。我朝輿地之廣。曠古所未有。學士大夫乘其雄渾之氣。以爲文者。固未易以一二數。然自天歷以來。擅名於海內。惟蜀郡虞公。豫章揭公。金華柳公。黃公而已。方是時。祖宗以深仁厚澤。涵養天下。垂五六十年。而戴白之老。童兒幼穉。相與鼓舞於里巷之間。晏然無以異於漢唐宋之盛時。故一時作者。率皆涵瀟茹和。以鳴太平之鴻休。其擯辭則擬諸漢唐。說理則本諸宋儒。而學問則優游於周之未衰。學者咸宗尙之。並稱之曰虞。揭。柳。黃。而本朝之盛極矣。繼是而起。以文名家者。猶不下數人。如莆田陳公之俊邁。則有得於虞公。新安程公之古潔。則有得於揭公。而臨川危公之浩博。則又兼得夫四公之長者。郁郁彬彬。何可及哉。近年以來。獨危公立幟詞壇。自餘數公。常想見其丰采。習聞其警效。邈然其不可接者久矣。於是淪沒殆盡。而得先生以紹其聲光。先生黃公之高第弟子。嘗負其所有。溯長江遊吳中。久之。自吳踰淮。泝黃河而北。達於燕趙。留輦轂之下。久之。於時雖未有所遇。然自京師及四方之士。無間識與不識。見其文者。莫不稱美之不置。則其得之黃公者深矣。豈惟黃公。蓋自虞。揭。而下數公。亦皆得而師友之。故其爲文。雍容紆徐。如冠冕佩玉。周旋堂陛之上。馳騁操縱。又如風雲虵鳥。按行於陣伍之間。而音節曲折。則與前之數公如出一律也。後由京師還吳中。居無何。我吳王聞其學問。卽以樞府都事起於家。不幾年間。遂屢遷而長其省幕。其後調太尉府參軍。由參軍升內史。跡愈顯而文愈工。國家之制作。及四方之求之者。皆隨手應之。蓋沛乎其無窮矣。夫自周衰以來。至於今。幾二千載。其閱世非

不遠也。歷年非不久也。能言之士非不多也。斯文能自振拔以追於古者。惟漢、唐、宋及我朝此四世而已。而四世之中。士之卓卓可稱述者。又不過數人焉。何才之不數出而人之難得若是哉。於此有人焉。能以卓卓可稱者自期待。又幸遭逢於時。而得大肆其著作。世其可不爲之貴重之與。余於先生之文。讀之累月。曾不能有所去取於其間。雖片言半幅。咸取而錄之者。所以明先生於一字之微。皆可爲斯世之貴重也。先生爲人溫良慈惠。其從政寬易愛人。與人交於恩義最篤。雖待臧獲初未嘗疾言厲色。平居蓋雍雍如也。若先生非所謂有德有言者耶。夫誦其詩讀其書。不知其人可乎。故予序先生之文而併及大要可紀者如此。先生名基。字敬初。夷白齋乃其自號也。故以題其藁云。至正二十有四年歲在甲辰夏五月朔旦書。